

周莊鎮志

周莊鎮志卷二

里人陶煦重輯

公署 附善局

鎮爲澤國四面環水港汊紛歧湖河聯絡咫尺往來皆須舟楫苟無鄉導則波浪迷途菱蘆蔽岸一經深入莫辨東西是以粵賊踞蘇城且四年而吾鎮獨未被擾者蓋以天然險要守之較易故也然易守者亦宵小所易伏 國初湖寇出沒曾

駐劄總兵一員在全福寺

卽楊公承祖

康熙元年設城守營千總

一員駐防周莊鎮管轄長洲崑山各汛十三年改設周莊汛把總一員經制外委一員時借居清遠庵東鄉約所內乾隆間移駐六直鎮帶兵八十名專防封門外水陸汛口十三處

咸豐三年分派把總駐防陳墓鎮經制外委駐防周莊鎮仍
借居鄉約所光緒三年撥增汎口二處歸周莊汎管轄

周莊汎管轄葑門外水陸汎口十三處撥增汎口二處

關廂汎

陸汎

接渡橋汎

以下水汎

寶帶橋汎

黃花橋汎

高塾汎

塘浦汎

大姚汎

周公址汎

周莊汎

陳

墓汎

六直東口汎

六直西口汎

尚明澱汎

尹山

橋汎

以下撥增

夾浦橋汎

巡檢司署

在鎮南清遠庵西本庵僧慧傳所遺禪房四進

先

月

樓乾隆二十六年江蘇巡撫陳文恭公宏謀疏請六直鎮巡

檢司移駐周莊鎮二十七年八月初任吳巡司錦購此改建

爲署道光三年大水漫淹巡司寓居封門外草野灣而署遂空閉二十九年復經水患圯毀無存同治二年六月里人稟請巡司蒞鎮卽賃民房爲公館至今因之

移駐周莊巡檢司部議

乾隆二十六年十月初九日吏部等部爲彙請移駐官員分防彈壓以裨地方事文選司案呈吏部鈔出江蘇巡撫陳宏謀題前事等因奉

旨該部議奏欽此會議得江蘇巡撫陳宏謀疏稱江蘇地廣事煩州縣耳目難周常資佐雜分駐協理其間地方情形先後不一職守繁簡彼此懸殊理應因地制宜隨時酌定以

收地方之益查蘇州府元和縣之六直鎮界連崑山新陽二縣支河汊港四通八達爲宵小出沒之所地方緊要雖有巡檢微員未足以資彈壓請將元和縣縣丞移駐六直鎮崑山新陽二縣之附近村莊并令兼轄其原駐六直鎮巡檢查有元和縣周莊一鎮地廣河多請將六直鎮巡檢移駐周莊改爲周莊巡檢司其攢典皂隸弓兵等役各仍其舊至六直鎮巡檢衙署已於乾隆二十三年經部覆准興建尚未領銀建造應卽改建縣丞衙署毋庸另議其周莊巡檢衙署應另行確查估計再元和縣縣丞旣移駐六直原管水利事務查有崑山縣主簿並無專司事件應請

改隸元和縣專司水利崑山主簿向有門子皂隸馬夫仍
合照額募充并請元和縣縣丞換給元和縣分防六直鎮
縣丞印記六直鎮巡檢換給元和縣周莊巡檢司印記其
崑山縣主簿向無鈐記今改爲元和縣主簿專司水利並
非分防地方照舊毋庸請給以上各缺均屬緊要應請嗣
後俱定爲要缺在外揀選崑山縣主簿今請改隸元和縣
所有該員廉俸及門子皂隸馬夫工食應卽改編元和縣
於地丁耗羨項下照例支給其六直縣丞周莊巡檢廉俸
役食均照原編支給毋庸更改謹會同兩江總督臣尹繼
善合詞具題等因前來查該撫等疏稱江蘇地廣事煩州

縣耳目難周常資佐雜分駐協理理應因地制宜隨時酌定以收地方之益等語應如該撫等所稱蘇州府元和縣六直鎮地方既係緊要巡檢不足以資彈壓准其將元和縣縣丞移駐六直鎮崑新二縣之附近各村莊准其兼轄其原駐六直鎮巡檢准其移駐周莊改爲周莊巡檢其攢典皂隸弓兵等役亦各仍其舊所有該縣丞巡檢廉俸役食准照原編支給毋庸更改六直鎮巡檢衙署該撫等旣稱已經准建尚未領銀建造應准其卽改建縣丞衙署毋庸另議其周莊巡檢衙署應令該撫速卽確估造冊送部查核其縣丞舊署應作何辦理之處一併查明報部元和

縣丞原管水利事務該撫等既稱查有崑山縣主簿並無專司事件應准其改隸元和縣專司水利門子皂隸馬夫等役仍令照額募充以上各缺准其定爲要缺在外揀選咨調其現任各員是否能勝新移要缺之任應令該撫等查明到日再議崑山縣主簿今改隸元和縣所有該員廉俸及門子皂隸馬夫工食應改隸元和縣於地丁耗羨項下支給報銷等因乾隆二十六年十二月初一日奉

旨依議欽此

乾隆二十七年七月接准吏部咨開元和縣六直鎮移駐周莊鎮巡檢准其將吳江縣分湖巡檢吳錦調補附入

月分彙題先行知照令其赴任辦事可也

八月撫憲飭知該員調赴新任辦事卽委興建衙署

陞府李行知元和縣周莊巡檢一員劃分管轄該縣周

莊鎮等處鄉汛八都一百三十七畝凡係緝捕盜賊盤詰

姦僞等項事宜均聽該巡檢解縣究治餘俱仍循其舊

計開劃分管轄都畝 二十四都正副扇三十畝 中二

十六都正副扇十一畝 南二十六都正副扇十六畝

二十七都正副扇十七畝 二十九都正副扇十七畝

南三十一都正副扇十三畝 中三十一都正副扇十七

畝 北三十一都正副扇十六畝

二十八年十月藩憲飭領 禮部頒發乾字一萬二千六

百五十八號元和縣周莊巡檢司印記一顆

乾隆二十七年七月日

禮部 造 遵卽領到開用

歷任巡司無從稽考茲以最著名者附載於左

唐上基字載宏湖南瀘溪縣廩貢生官於鎮八年初係署
事繼卽實授公正廉明恩威並著里人爲上鎮俗宜民頌
額乾隆四十二年丁憂去任母櫬在署貧不能舉衆爲醵
金以送之乃得歸

喻榮疆字朴堂江西南昌縣附監生嘉慶間在任六年除
暴安良士民悅服好屬文頗簡淨陳勰增輯貞豐擬乘序

言是其手筆

袁鍾琳字亦齋浙江錢塘縣附貢生隨園之姪父知官山西雁平道年七十而生鍾琳早歲工舉業主試者奇其文擬爲元會疾作搗之入臥室而昏不知人乃易以他卷及愈榜已定遂見遺鍾琳因是棄去援例以巡檢分發江蘇候補繼入吉勇烈公爾杭阿幕補吳縣角頭司咸豐庚申七月賊陷西洞庭山鍾琳赴太湖殉難適遇救至上海李爵相鴻章委辦金澤釐捐先是吾鎮蔣巡司文斌於庚申六月丁母憂時值道梗卽以印信交太湖廳太湖廳轉交鍾琳權管及至上海藩司遂令其兼署同治癸亥經里人

稟請始涖鎮儒雅風流時與諸同志詩酒往還甚相得也
甲子春招在鎮生童集其公館爲文會供備飲食一月兩
舉親定甲乙前列者贈以書籍自是文風大振震澤莊人
寶吳江陳麟於是歲冬及丁卯科先後領鄉薦乙丑秋院
試入泮者九人羣頌鍾琳獎勵之功丙寅夏回任西山送
行者衣冠塞道詩卷盈篋稱極盛焉

淞南營遊擊署 同治七年曾文正公國藩奏設裏河水師五
營其一卽淞南營也十一年復奏續議章程擬建署於周莊
鎮之西隅部議均報可卽於是歲九月到防營官遊擊一員
初任葉哨官中軍守備一員千總三員把總七員外委六員
公廣全

舳板礮船十八號以二號爲總巡餘分四哨左哨駐本鎮右哨駐青浦之河圖浜前哨駐九里湖後哨駐平望鎮光緒四年五月經署營官廖協鎮德旺暨工程局馮委員渭元和陽邑尊肇先勘購得鎮北下江字圩民田二十七畝有奇以作操場卽爲署基

改設淞南營水師奏議

大學士調任兩江總督臣曾國藩奏爲酌議江蘇水師事宜恭摺仰祈

聖鑒事竊臣擬酌改江南水師營制業於本年四月初七日附片陳奏大概在案伏思釐定新章必須參稽舊制查中樞

政考所載江南水師向分外海內河兩支外海兵六千七百七十六名官一百一十八員內河兵八千零二十一名官一百三十三員其船數則無可稽考道光二十四年前督臣璧昌奏稱江南舊例營船二百七十五隻業已破廢不堪另造舳板船一百三十五號大舳船十二號等語約而計之其船不過裝載二千數百人額定之兵尚有萬餘人無船可載有水師之名無舟楫之實不能不大爲變通講求實際竊謂水師之多少宜以船隻之多少爲斷無船則兵無用武之地官爲虛設之員欲定水兵之額數必先籌口糧之入款兼籌修船之經費卽如外海船隻需用廣

艇紅單拖櫓之類每造一號動費數千金夾底者或萬餘金加以大小修整繩索損具子藥礮械所費更爲不貲上而火輪兵船用款尤鉅下而舳板小艇需費亦繁竭江蘇之物力不過辦船百餘號裝兵三千餘人而止其不能不大裁舊制之兵酌減舊設之官者勢也至於養兵之餉舊制水師亦照綠營之例有馬糧戰糧守糧等名目平日或小賢營生或手藝餬口尚不足以自存今旣責令常住船上不得不稍從優厚故長江章程兵糧月支二兩七錢或三兩不等較戰糧已加一倍較守糧幾加二倍今議江蘇水師亦宜仿照長江之例外海則尚須畧增自軍興以來

綠營之兵無功各省之勇著績兵丁亦頗以平素餉薄爲詞今欲一兵收一兵之用不能不酌增口糧者亦勢也惟旣增出款卽須籌入款長江之餉五省各留釐卡一處係出於常賦之外臣尙以太多爲慮江蘇水師則經費出自司庫斷不能於正額之外添出無著之餉尤不可徂抽釐之說留一永遠之卡溯查乾隆四十七年增兵六萬有奇其時大學士阿桂上疏陳論以爲國家經費驟加不覺其多歲支則難爲繼臣國藩於咸豐元年在侍郎任內奏請裁兵卽引伸其言歎爲遠慮今日整理水師豈肯盡背其言江蘇水師嘉慶道光年間每歲用銀若干蘇省無案可

稽此時約畧計算總不使新章之銀浮於舊制之外如其
不敷更須酌裁陸兵以補救之不獨江蘇爲然也卽沿海
各省整頓水師均須核算餉項如使新餉果浮於原數卽
應兼裁陸兵以酌濟水餉蓋水師久無戰船非修造兩三
年不能集事陸路縱缺額兵苟募勇兩三月卽可成軍陸
路則有事招勇無事裁撤水路則製器於多年取用於一
旦權衡緩急海軍似以水營爲重其他省之但有陸兵并
無水師者縱不遽議裁撤趁此中原大定之際亦可將出
缺之弁兵緩至二十年後再議募補將來重募之日儘可
倣浙江之例大減額兵酌加口糧此又因節省經費而兼

籌陸營之計也謹議江蘇水師事宜十四條營制十六條繕具清摺恭呈

御覽伏乞

敕下各衙門詳細會議歸於至當凡重臣奏事每畏部臣駁詰亦古來之恆情獨至此等大政則不畏駁詰且惟恐其不駁惟恐其少駁目前多一詰難日後少一愆尤不特求部臣再三駁詰卽江蘇前後各任如協辦大學士湖廣督臣李鴻章在蘇省用兵最久洞悉水陸情形兩江督臣馬新貽在浙江辦理減兵事件講求已熟江蘇撫臣丁日昌素有捍禦外洋之志并請

敕下李鴻章馬新貽丁日昌各抒所見將江蘇水師船政妥爲核議務使外防與內盜并謀舊制與新章兼顧臣雖離兩江倘有所見仍當續行陳議期於利多弊少不特江蘇爲然卽長江水師亦乞

敕下沿江五省督撫隨時察看如有不妥之處三年以內儘可奏明斟酌損益臣斷不因係初議之人稍存迴護之見臣之微意不過欲使中國兵勇以舟楫爲室家以海洋爲坦道庶幾事以屢試而漸精人以狎水而漸壯至於船式如何而後善營制如何而後強自當博采羣言不敢畧執成見也一俟江蘇水師定章後沿海閩粵各省均可參酌辦

理大局幸甚所有酌議江蘇水師事宜緣山謹會同兩江督臣馬新貽江蘇撫臣丁日昌恭摺具奏伏乞

聖覽訓示謹奏

酌議江蘇水師事宜十四條

全錄一條
摘錄四條

第一條分別內洋外海及裏河三支

原制水師內河外海分爲兩支今擬改爲

三大支曰內洋曰外海曰裏河
浸太湖入海凡分三道北爲劉河南爲黃浦江中爲吳淞
江此裏河也就裏河而論太湖久爲盜藪而泖湖澱山陽
城昆城等河及福山江陰等口亦常有搶劫之案水師均
少不可

第三條裏河水師分立營數

江蘇裏河向有提標右營太湖
水師左營右營茲仍其舊

而另添添北營淞南營共爲五營淞北營巡緝吳淞江以
北之支河湖蕩如尚湖昆城湖陽城湖金雞湖之類并查

劉河白柳七了福山江陰等出江之口湖南營巡緝吳淞
江以南之支河湖蕩如澱山湖澄湖龐山湖鴛脰湖暨葉
舍蕩王江涇等處與浙江接界槍船出沒之所汛地至三
泖爲止太湖左營巡緝東路蘇州所屬湖面右營巡緝西
路常州所屬湖面兼查運河東汎西汎長蕩湖滬湖等處
提標右營巡緝自三泖起至吳淞口止專防黃浦江駛入
腹地之門戶凡裏河五營不復分隸各鎮專歸提督統轄
仍聽督撫節制惟從前舊制內河各營雖名水師實則並
管陸路各有汛地此次五營所分段太寬支流太多凡
近水面有事皆係水師之責近水口岸亦可兼顧若離岸
稍遠水師不能兼顧

第五條各營船制數目

擬造長江之式舢板七十六號淞

北淞南營各十五號太湖兩營各
十三號兼用八團舢板各二號提標右營二十
號每號配兵十四名八團舢板配兵約二十名

第七條設廠修造戰船

現定于金陵之燕子磯設立船廠
其裏河五營所用之舢板即用李

朝斌所部太湖水勇之船目前暫可無須另造然其中多
有咸豐八九年以後所修造者漸已朽壞勢亦不能久待

卽當陸續抽換將來三年一小修十二年一更換均照長江之例排子丑寅卯年分舢板在金陵船廠輪流興工

第九條弁兵薪糧長江章程兵丁中舵工月支三兩六錢管艙頭工破手等月支三兩二兩七錢茲定裏河五營將弁兵丁書識等悉照長江水師章程給發

江蘇水師酌改舊制及擬裁官兵清單

共十六條全錄一條

督標所屬之內河京口協右營

原制游擊一人守備一人千總二人把總五人外委

六人共官十五員配兵八百七十六名今擬改爲淞南營以游擊爲營官用長江舢板船十五號共哨官十五員內守備一員千總三員把總十員外委一員每號配兵十四名共兵二百一十名 照舊制裁去外委五員其所添之千總一員擬以吳淞營千總一員移調其所添之把總五員擬以福山鎮中營把總一員川沙營把總四員移調

兵部爲知照事武選司案呈本部會議調任兩江總督曾

奏酌議江蘇水師營制事宜分擬條款各件一摺於同

治八年三月二十日具奏奉

旨依議欽此單三件奉

旨覽欽此相應刷印原奏摺單附入馬遞知照該督可也

原任大學士兩江總督臣曾國藩奏爲續議江蘇水師事宜恭摺仰祈

聖鑒事竊臣議改江蘇水師章程於同治七年十一月初四日專摺具陳旋准兵部會議復奏請

旨敕下兩江總督等查照各條妥爲辦理各等因於同治八年三月間知會到蘇彼時臣已赴任直隸前兩江督臣馬新貽逐條核辦與提臣李朝斌及蘇松狼山福山三鎮總兵

詳細斟酌畧有損益並諮訪熟於江蘇營伍之人參酌舊制釐定新章二十五條馬新貽業已定稿過印擬於大閱之時察看各處地勢再行具奏臣接任後查閱馬新貽所定原稿大致畧備其中有數事與原奏稍異者如裏河五營內之淞南淞北兩營地段太寬船隻太少提臣李朝斌屢有改章之請馬新貽以奏定之案不欲率爾更張往返籌議至再至三今年派員勘查裏河各地段一次始定仍如前議畧添船隻而於汎地之中專以官塘幹河爲重支河汊港處分從寬俾責任較專而巡查易遍此馬新貽尚未確定而近日議妥者也又如蘇松狼福等三鎮額兵臣

初次議奏除水兵分船派定外每鎮各留陸兵一百名本謂水師以船爲家不必尚存陸兵名目嗣後馬新貽博采衆議僉謂三鎮陸兵有必須承應之差有不可盡廢之勢改爲蘇松狼山兩鎮各留五百名福山鎮本有右營陸兵計原額五百三十三名現祇存兵二百名擬再招二百名合之原奏一百名亦成五百名之數其統帶之官弁互有更換又如海門一營原奏擬歸狼山鎮統轄嗣經李朝斌與馬新貽會商以海門營汛地離狼山鎮爲遠而離蘇松鎮爲近擬改撥蘇松鎮管轄以期形勢聯絡此二條皆馬新貽所改定臣復加察核無以易之者也其餘各條俱就

原奏應辦之事一一臚列大致與長江章程相彷彿惟彼則創始此則酌改故於新章之中仍須兼顧舊制馬新貽屬稿時苦心經營實屬詳備臣就原稿二十五條中刪減三條歸併一條定爲二十一條另繕清單恭呈

御覽伏乞

敕下各衙門詳議定奪臣之微意總以水師之住船譬諸陸師之紮營狎習舟居爲水師之根本講求船礮爲禦外之根本是以區區籌議迭次瀆陳然皆不過就嘉慶道光年間之規模稍加整理至異日輪船逾多或者外海內江悉用輪舟則今日所辦之船所立之法將悉爲可棄之筌蹄是

所望於後之賢者因時變通臣之才智尚未暇及此也至馬新貽所議章程近年行之已有成效自應參酌上陳以補臣原奏所不逮所有續議江蘇水師事宜緣由謹會同江蘇巡撫臣張之萬恭摺具奏伏乞

聖鑒訓示謹奏

續議江蘇水師章程二十一條

全錄二條
摘錄九條

第三條裏河五營劃分汎界

查原奏淞南淞北兩營分轄吳淞江南北兩岸太湖左右

兩營分巡太湖東西兩路提標右營專防黃浦一江凡水師與陸營交界之處因應劃清界限卽各該營汎境亦應明晰分定今擬提右一營分前後左右四哨內前後兩哨每船五號左右兩哨每船四號尚餘兩號作爲營官總巡之船太湖左右兩哨每船四號尚餘兩號作爲營官總巡船共計十六船太湖兩營各餘八團舢板兩號淞南淞北

兩營各餘舢板二號均作爲營官總巡之船淞南營轄吳淞江以南自三江口以東以吳淞江爲界三江口以西以致和塘與淞北營分界南以運河震澤梅堰塘與太湖左營分界淞北營轄吳淞江以北自三江口以東以吳淞江分界三江口以西以運河太湖右營分界太湖左營巡緝東路東南以運河震澤梅堰塘與淞南營分界太湖右營巡緝西路西北以運河與淞北營分界其左右兩營卽以沙墩港口分界其運河由望亭至沙墩港口歸左營巡緝由沙墩港口出口卽屬右營湖面仍歸吳塘馬山埭嘴沙墩各汛巡緝提標右營專防黃浦一江自三泖起至吳淞口止專歸巡緝惟太湖等四營汛地湖蕩支渠紛歧錯出應以官塘幹河爲專責以支河汊港爲兼巡每一營四哨分紮四段輪流巡哨各專責成各該營與陸營分界應以近岸一里爲率其鎮市設有陸汛係在官塘幹河者一里以內水陸分任其責其有與長江內洋各營分界處所應以進口五里爲率所有各該營分隊駐船汛界已飭開具細摺呈送應俟定案後彙造營制冊圖送部查核

第四條淞南淞北太湖左右四營酌添船隻

查原奏淞北淞南兩營各

設舳板船十五號太湖兩營各設舳板船十三號兼用八
團舳板船各二號提標右營設舳板船二十號每舳板船
配兵十四名復查提右營專防黃浦一江船隻尚敷分布
淞南北及太湖左右四營地段太寬船隻太少分巡扼要
在在難周今擬該四營各添船三號每船仍配兵十四名
計四營共添船十二號應添兵一百六十八名加以添派
官弁應給廉糧經費雖不免增多而於設防巡緝較有裨益

第九條核定將弁處分

裏河五營內提右一營專防黃浦

查參其餘四營每營分爲四段每段派船四號以官塘幹
河爲專責以支河汊港爲兼巡各認汛地不必會哨如有
失事在官塘幹河者照專汛之例由營官開送職名查參
在支河汊港者照兼轄之例均應照長江章程以都守千
把外委五項哨官爲專汛之官以副參游都司四項營官
爲本轄之官遇有搶劫案件專汛哨官保何職名應由該
營官指出初參仍照定例四月限滿題參疏防專汛官住
俸本轄者罰俸六個月二三四等參向例一年限期者酌
量加重改爲各予限八個月二參限滿專汛官加重降二級留任
任本轄者罰俸一年三參限滿專汛官加重降二級留任

四參限滿專汎官加重降二級調用不准抵銷如汎內有一夜連劫數次情事仍照舊例俟三個月限滿犯無弋獲即將專汎官降二級調用本轄官降二級留任倘能於限內獲犯過半兼獲盜首者均准免其參處失事之時營官一面報明提鎮移知臬司州縣官一面稟明本府臬司如本營屆期不參卽由臬司揭參

第十一條酌定外委缺數

淞南營應裁千總一員把總三員改設外委四員以符營制

第十三條營官建署地方

提標右營上海城內本有參將衙署毋庸另建淞北營應於常熟城外建署淞南營應於周莊鎮西隅建署太湖左營應在東山重建新署太湖右營應在宜興之烏溪關建署以重汎守其各船哨官自都司以至外委不立衙署不准登岸居住違者官卽革職兵卽革糧再各營官建署後應各給差兵十名以資照料均於提標各營未經募足之空額內撥給

第十四條各營座船數目

副參游各給座船二號各營哨官白都司以至外委各給座船

一號副參游每座船各月支銀十四兩都守以下每座船各月支銀十二兩惟太湖右營係以都司爲營官應准給

座船二號
以示區別

第十六條核定書吏名數

副參游各用稿書二名書識四名都司各用稿書一名書識二名

名惟太湖右營都司係屬營官應用稿書二名書識三名守備各用書識二名惟淞南淞北太湖左狼山右福山左五營並無都司專設守備一員事務較繁應各加稿書一名其各船千把外委同係哨官亦有應辦之事各准用書識一名

第十七條雨篷旗幟等項

查長江章程長龍戰船每年發銀六十兩今八團舢板與長龍

相等擬定每年亦發銀六十兩長江舢板照章每年發銀四十兩交各該營哨官採辦修飾

第十九條各營船隻配用槍礮數目

裏河五營八團舢板四隻每船配礮五尊

洋槍六桿舢板八十八隻每船配礮二尊洋槍四桿此外長矛刀杈噴筒亦須隨宜配用

第二十條各船火藥洋火子彈等項數目

土藥鐵子鉛丸擬在蘇州設局

製造洋藥洋火等項擬在上海陸續購

買內洋裏河十營就近在蘇局請領

第二十一條核計餉數

江蘇水師二十一營除未經裁減之鹽城東海兩營計原設水師十

九營額支舊餉二十四萬零三十四兩有奇現在新立外海內洋裏河十六營除輪船外每歲約需銀二十三萬兩有奇核之十九營額餉尚屬有減無增

兵部爲行文事武選司案呈所有會議江蘇水師事宜一摺於同治十一年七月初十日具奏奉

旨依議欽此相應拈連刷單附入馬遞行兩江總督可也須至咨者

汎房 在鎮北永慶庵左卽所稱營房場也其三間向爲汎兵所居起建未詳咸豐庚申後汎兵他徙房遂圯廢

鄉約所 在鎮南清遠庵東明嘉靖間巡撫陳公諭令鄉鎮設立鄉約所擇廟宇中之寬敞者爲之 本朝康熙甲子湯文正公斌開府吳中首重鄉約郡博士趙佚其名舉徐沂爲三閭約正朔望宣講書有楹聯云上遵周孔訓旁鑒老莊言同治間 詔令各州縣學官按期臨鎮督講 聖諭廣訓初仍在舊所今移於澄虛道院

社倉 在鎮北篋竹埭乾隆五年巡撫徐公咨請各鄉鎮建置社倉七年元和黃邑尊建中諭勸鎮中積穀爲建倉屋五間立社長二人

沈文淵計士登

任其事今倉屋已圯穀久無存矣

惜字局 在東莊地桃花庵內康熙間庵僧了能募緣創設親

自收拾焚化後其徒了然繼之俞世琬歲助粟二石以爲供
雍正十一年始捐置飯僧田嘉慶初爲人竊賣道光二年里
人糾一文願重爲整頓七年將局務併入澄虛道院文昌社
同治五年復起百文願增置局田卽屬鄭長齡經理八年刻
有徵信錄

張冷桃花庵惜字緣啟契代結繩畫原配卦故六書始出
神鬼皆驚而四韻初諧陰陽悉協先成蝌蚪之文續有篆
籀之學漸變真楷復行章草帝王藉之以布政令聖賢資
之以撰詩書投檄而通四海傳譯以來八荒莫不尊崇罔
敢褻越是以篋底夜光聯珠璣而耀采箋中雲氣貫星斗

而揚輝或擲地而發金聲千秋寄賞或飛天而赴海國萬里驚人此一字一縑不當蔑視且萬言萬寶何得輕污今桃花庵僧了能願從梵課之餘拾棄字以投籃樂向街坊之側覓廢紙以歸院單詞隻句俱棲龍藏之天亂楮殘編悉入菩提之果有功於三教之書不致遭人蹂躪盡心爲十方之計自應授彼糈糈伏望同心交相集腋或捐升斗或出釜庾用酬緇侶之勤靜俟文昌之報抒此蕪言普爲傳告徐鑰桃花庵惜字局飯僧田記儒與佛不相謀也而相爲功儒有禮佛用以接其徒衆儒有樂佛用以宣其聲教儒治農工商賈佛資其力以安居而休養儒之爲功於

佛不誠大哉而佛亦以其慈悲因果之說勸誘天下以助
儒教之所不及此不可謂非佛之爲功於儒者也抑又有
不止此者今夫儒之爲教莫重於六書自六書成而後有
易書詩禮之文而後有二帝三王周公孔子之道使終古
長此結繩之治而無書天下且不知有聖人又安有所謂
儒是其珍重宜何如而可聽其狼籍垢污而不知惜哉第
儒者藏修息游勢不能奔走道路厯街衢巷陌以收而惜
之佛者捨身利濟可以爲儒之所不能爲於是藉佛之人
崇儒之教用其餘閒收惜遺棄而六書遂無狼藉垢污之
患此其有功於儒也亦不小矣里之東桃花庵歲久傾圯

康熙五十二年癸巳之夏族叔祖晉功公勸募重修規模一新住僧屢易至了然而整理完備會里中諸儒家舉惜字社遂以其事付之俞君曰囊歲出粟二石以爲供後諸同志議久遠之規欲置飯僧田若干畝俞君令嗣蒼培首爲蠲金餘各隨力之多寡共襄厥事了然亦出鉢資以佐成之今了然食其租司其事復得招延弟子以永其傳其相爲功甯有旣哉夫惜字之舉行於鄉國郡邑者多矣招提梵舍之飯僧田抑又久矣而因惜字而置飯僧田則自吾里桃花庵始余亦儒家應惟一陶世兄教且心喜其事之成而可久也於是乎記鄭祥徵文昌社惜字局合并記

國有四民士居其首功名之士類聚簪纓於是有文昌社
好修之士尊崇經籍於是有惜字局要皆源本於詩書一
而二二而一者也吾里惜字局起自 國朝康熙年間至
雍正癸丑秋捐置飯僧田五畝三分徐允恭先生爲碑文
記其巔末其後竭力圩田二畝五分爲人所竊賣僅存嚴
字圩田生息旣微局事漸廢道光壬午春諸同人重爲整
理於里中糾一文錢願積之四年贖歸原田又增置父字
圩田二畝九分立司季四人掌租息供官稅司月二十四
人專管字紙揀剔穢雜收拾焚化司事四人綜理局務蓋
章程比前嚴且密矣而澄虛道院文昌社向有房租以供

社事丙戌夏其房爲原主贖去社中積貲旣少勢難延久
諸同人復議以其錢歸入惜字局益以局存餘貲增置下
江圩田一畝九分收息以供 帝君聖誕之用其或不足
間以惜字義餘此文昌社惜字局所以合并也夫事固有
相待而俱成亦有相資而並永者社與局之由來久矣惜
字不可廢文社其可已乎今台兩事之人於一處且有田
租以給費用則文社之俎豆可以因字局之資助而相繼
不窮字局之經營可以因文社之人才而永興弗替一舉
而兩善備焉不亦里之盛事哉爰記其合并之年月以泐
於石時道光丁亥夏五月也

懷善局 借設在中市澄虛道院乾隆三十五年廷鑑創捐
施棺設局永慶庵文昌閣下嘉慶十一年先祖諱秉信偕同
志重整局務始移設道院增置義塚葬船按時掩埋道光以
來先父諱邁宗及褚允玉沈人驥相繼承辦咸豐七年復添
辦收殮路斃浮屍並於永慶庵側架屋三楹爲公所同治三
年奉府諭修舉善堂衆議屬煦任其事光緒元年刻有徵信
錄序中備記是局始末

朱同仁懷善局施棺序蓋聞姬室興王曾埋無主之骨谷
風棄婦亦救凡民之喪可見不忍之心聖愚皆有同類之
恤今古一揆矣然而桓子治三年之槨季氏載六樹之槨

又或郭鳳善占預謀諸市徐栩有馬不累於人此則雖悼
生命之靡常已幸殘骸之有託若乃門衰祚薄並無強近
之親運室時艱素有飢寒之患一旦宛其死矣愁吟蟋蟀
之篇傷哉貧也痛乏螻蟻之備借曰裹之以革茲非死綬
之忠如云衣之以薪尤乖錫類之孝嗟乎白玉不降於天
青蠅空弔於室見者慘目念之傷心爰有樸庵先生仁慈
成性利濟爲懷用集同人襄茲義舉八文之願可稱惠不
費財二寸之杉足令膚無親土毋濫施以博名毋吝予而
傷惠務使死者免於委壑生者不致泚頰庶幾甄舒仲無
煩夢告冀不忝文苑之林若謂赤丁子可以名呼莫誤信

瀟湘之錄陶然重整懷善局記嗚呼大夢悠悠至就木而
同歸於盡孤魂渺渺必入土而始得所安然而白草荒涼
青楓寂寞生前石槨人人募司馬三年死後桐棺往往欠
參軍一錫出北邙而直視景最傷心繼西伯之陰行恩誰
及骨所以除鼯之職設自周官掩骼之條頒從月令制彌
善也功甚深也吾里貞豐離城僻遠江湖環其四面煙火
聚乎千家豈無桑下餓人倉黃瞑目亦有蘆中窮士漂泊
捐軀黃金誰布地而施白玉不從天而降生難餬口沒且
暴骸雨雪飄零冰霜刻畫卽過客猶酸心而欲涕豈居人
忍袖手而旁觀先大父樸齋贈公深痛於衷屢蒿於目於

嘉慶間重設懷善局捐金錢而結社備櫓櫓以施貧或保鄉人或爲旅客或領從保甲或求自親丁苟託帡幪咸資疎翳至郊外傾頽之厝與道旁朽腐之棺楮幘全灰吹秋風而瑟瑟篠衣半露照夜月而淒淒亦復隨處收埋按時掩覆薄杉三寸皆蒙後事之矜荒草一抔得免前和之見自是而後相沿爲常道光初年局事就替先叔父東籬贈公復贊成之迄今三十餘年矣捐貲之數漸虧董事之人亦謝覩荒原之委棄露骨誰憐慨善舉之淩夷婆心孰繼爰有好施之士同修將廢之規闢僧居而屋建三楹增義塚而田捐數畝章旣率山乎舊例還添設乎新蓋昔惟有

主之骸或施以木而今并無依之殍亦殮以棺立意彌周
推恩較廣嗟嗟烏鳶螻蟻達人之論雖高蠅蚋狐狸仁者
之懷曷忍惟合成城之志以宏覆簣之功里中無送死之
虞儘彼歌蒿而去泉下有更生之感知他結草而來

保嬰會 同治六年王承浩戴起曾倡糾同志二十人結會於
澄虛道院復設接嬰所於鄭長齡家有送嬰來者獎以錢每
得一嬰則制衣襦履乳媪轉而送入郡城育嬰堂凡所需用
二十人均任之而專屬鄭長齡主其事葉錦孫司出納焉時
近地舉行保嬰者尚少其嬰且遠自莘塔蘆墟而來故統一
歲計不下一二十名今則各處皆設法留養而吾鎮遂稍殺

於初矣

鎮中曾於同治十年創設崇德堂鄭長齡董其事未幾與
清遠庵僧及汎官訟長齡卽以病稟於府請退焉是堂遂
歸萃塔鎮副貢生淩泗承辦故不贅

第宅

沈萬三宅 周莊以村落而闢爲鎮實沈萬三父子之功當時
鎮西半皆墓地人烟所萃惟嚴字一圩其東南隅曰東垞萬
三住宅在焉西北半里許卽東莊地及銀子浜倉庫園亭與
住宅互相聯絡其巨富氣象猶可想見然亦僅中人家制耳
楊循吉蘇談載萬三家在周莊破屋猶存不甚宏大可知萬
三里居並無豪侈之蹟故明太祖雖忌之而無可加誅也按
東垞在鎮之東偏過一水卽青浦界距鎮西之屬吳江者尚
三里許吳江縣志載萬三宅在縣之二十九都周莊蓋誤
四留草堂 在魚池岸上明長庠生戴之佐所居茅茨不葺有

隱士風崇禎間與楊廷樞朱隗葉襄魏風諸名流結文社於此有薰香齋者在草堂左近之佐族叔明國子監生汝義課其子順治辛卯舉人悅讀書處也汝義富而之佐貧嘗分財與之餘詳雜記

文郁堂 在澄虛道院之西明長庠生屠彥徵宅也嘗與陶唐諫鄭任方九臯沈自鳳徐汝璞管淵丁社僧廣明九人仿香山故事結耆英社極一時詩酒之樂今讀其自撰小引及諸老題詠尚想見杖履風流

屠彥徵耆英社集小引百歲流光萬物乃天地逆旅四時行樂吾輩皆風月主人身居白蜺之濱地隔紅塵之外儘

可傍花隨柳庶幾游目騁懷節岸駸駸莫負芒屨竹杖杯
盤草草何慚野寂山君雖云一餉之清歡亦是千秋之作
話敢期同志互作遨頭慨元祐之耆英衣冠渺矣集永和
之少長觴詠依然後約斯留前盟勿替陶唐諫文郁堂耆
英社集詩尋盟久矣屬騷人今日多君氣誼眞社結香山
詩一首觴流曲水酒干巡金華露浥林誇壽寶劍光韜漫
說貧喚我鳥聲春正好莫教寂寞負花晨偕廣明詩百年
一夢耳萬事如蕉鹿人生會有歸何苦日奔逐吾里諸耆
英悟斯能自淑結社追高風未許東林獨竊愧樗櫟材亦
得隨芳躅小集選良辰俟彼六月伏薰風殿角來清陰貫

喬木松徑響足音白駒繫空谷徐汝璞詩花月多情好結
緣一觴一詠樂堯天吾儕也是神仙侶豈讓當時洛下賢
居彥微和韻詩老作遼頭結暮綠風流端不讓登天春風
三月鶯聲巧有酒何分聖與賢

怡順堂 在永安橋之南明長庠生徐汝璞宅也時與耆英社
諸老宴集於此

居彥微怡順堂社集詩并序石翁抱疴兩月中秋前四日
設酌招同人候月興致不淺知旦夕可占勿藥也漫賦誌
喜文壇月夕逼中秋風雅壺觴分外幽長使清樽饒白髮
直教北海邇南州聯吟思出高雲迴縱飲身忘冷露流珍

重主人休戀客安心坐守藥鑪頭毛瑩詩草野誰開混沌
天陡然來此趁良緣餘糧擬飽松脂嫩高曾將臨桂魄圓
鳩杖有心肩伯仲鶴觴何幸挹神仙因知勝事隨人取不
信風光此地偏管淵詩筵開從日午洗盞月初懸露湛光
如玉觴飛酒似泉分題愁險韻接座遙高年今夕知何夕
重逢洛下賢鄭任詩採藥歸來晚慚充第九仙席移花亂
落燈燼月高懸老子興不淺衆賓致亦然今宵拚一醉藉
枕石頭眠徐汝璞自述詩憐余久卧疴遠邇咸趨候時當
值月社開樽以爲壽有核與香花錯雜陳俎豆草堂須款
留卜夜先卜晝斗酒詩百篇珠璣光座右歡聲動星辰朽

骨邀天佑二豎不能容投諸有北又姮娥頗相憐半面窺
肥瘦送客白滿街一路如霜覆

蘭芷軒 在清遠庵後鄭任讀書處也嘗與屠彥徵毛瑩徐汝
璞宴集其中時屠年八十三毛年七十七鄭年七十一徐年
六十九四人適三百歲乃用白香山詩爲起句各賦二絕瑩
子錫年爲繪四老圖

張冷四老圖序惠人鄭子神遠徐子余少年交也因鄭子
而識其尊人約房翁因徐子而識其尊人我石翁又因兩
翁而識君聘屠翁旣而驀遭鼎革飄零轉徙遂與鄭子徐
子濶疎四十餘年今來相遇俱已白首其兩翁與屠翁悉

已物化鄭子一日出四老圖示余余諦視之三翁嘗親炙其風采獨湛光毛翁生平所欣慕而未見者今咸挹於圖中丰神爭躍躍於毫素間也圖之作起於鄭翁蘭芷軒之會是日也涼風爽然微旭澹然梧影翻階菊香浮尊割松江之鱸烹顧渚之茗幽懷畢吐逸興遄飛其幅巾篋衣而上坐者屠翁也科頭顴鼻望之有軒昂之氣者毛翁也垂翅紗巾紫衣而掩映於雙桐之間者徐翁也手拭如意微吟而有所思者鄭翁也鄭子指圖而言曰當日四老談讌於上我與毛翁之令子康叔趨承於下默數四老之年適符三百遂舉白香山四箇老人三百歲之句以進賀各獻

一觴四老亦掀髯撫掌就香山所倡之句各賦二絕康叔
素精繪事因命作圖以侈奇遇供佳話嗚呼世變滄桑之
際風煙沸擾衣冠流離有不幸而陷兵燹有不守而失堅
貞獨此四老人爲海上之輕鷗爲雲中之野鶴逍遙物外
時相過從賦詩飲酒陶情於水邊林下豈不足與香山四
老之會千古相輝映也乎況彼四老者俱圭組之龐眉此
四老者悉江湖之逸叟彼處其腴此處其清彼得其華此
得其介彼當退閒而有盤礴之致此當高尚而有瀟灑之
風先後相方庶幾無愧當日香山又有句云人間此會亦
應稀自唐長慶間厯世至此一千餘年然後又有四老而

當三百歲詎非極難遇而不可多得者耶余述其畧以誌
吾黨之盛事若夫四老品行之概各有傳紀在茲不贅及
屠彥徵蘭芷軒四老社集起用香山句詩四箇老人三百
歲筵開先我一甌茶恩恩八十年前事旭日初臨今日斜
四箇老人三百歲時來溪口眺青山主翁健步同相賞不
費攜筇往與還毛瑩詩四箇老人三百歲一番中酒不嫌
茶笑余蹇步偏移艇歸去何愁路狹斜四箇老人三百歲
幽居無異住深山坐中儘有醫王在謂藥房底用延年借大
還鄭任詩四箇老人三百歲清談爲供趙州茶恰逢花發
東籬下相對盤桓日影斜四箇老人三百歲風流堪繼白

香山微醺曳杖溪橋暮盡識先生谷口還徐汝璞詩四箇
老人三百歲秋來同啜早春茶數年十萬八千日笑指桑
榆暮景斜四箇老人三百歲水鄉結伴勝居山閒時領畧
煙波趣一葉輕舟任往還

問年堂 在南柵下塘老人郁敬雲所居敬雲於康熙二十三
年恭逢 聖祖南巡時年七十五以老人接 駕於靈巖
聖祖見其蒼髯古貌問曰年幾何矣敬雲悚懼誤以八十對
玉音有穀了之諭及歸遂以問年名其堂吳冢宰一輩爲
之書匾後至八十歲果無疾而逝

磊園 在福洪橋東南歲貢生徐稜所居園多湖石因以爲號

門外有大樹數株綠陰四覆今樹已無存而人猶稱大樹頭
徐家云

見南草堂 在後港太平橋西副貢生陶善圻讀書處也善圻
祖居城隍埭初遷楊家潭續又構此

池上草堂 在太平橋西北卽今張氏之漾月樓也乾隆初爲
詩人俞達住宅前後臨池波光四映煦嘗登樓俯仰想見當
日座上客常滿尊中酒不空之概

俞達自題池上草堂詩草堂池上似浮艘疎豁仍開四面
窗北望青螺當北牖東流白蜺卽東江水花春泳魚千百
雪葉秋飛鳥一雙時復醉眠方竹榻翠濤枕畔任春撞俞

濂步韻詩地分南北不通艘恰好茅堂闢短窗文構奇思
邀遠岫詩吟高調落清江稻畦懶與耕鋤伍花徑常陪蠟
屐雙更喜東鄰禪榻近鐘聲隔水有僧撞

緣天書屋 恩兄弟所居樂山堂祖宅前臨中市後通楊家潭
咸豐己未煦於潭東構儀一堂蓋卽章騰龍緣天書屋遺址
騰龍晚年旋里閉戶著書貞豐擬乘亦於此編輯今煦旣居
其地復增輯其書前後一百二十餘年何蹤蹟之適相符合
也

小神仙館 在化字圩新開河北家伯父諱保宗所構宅後小
園也屋僅二十餘楹而前後有兩池前池環立湖石一小亭

翼臨水面魚梁渡焉後池則疊石爲山山頂可坐五六人旁有洞下通池上小橋雜植花果間以竹樹風晨月夕雅足流連伯父於其中延師課元勳元照兩兄讀後然弟亦啟蒙焉惜在鎮之最低處道光己酉水過半扉畫檻雕欄已多摧折今則荒蕪日甚矣

棠巢吟館 在西市貞豐橋東煦之姊壻戴其章暨其弟其相讀書處也庭有鐵幹蓮花海棠一株高出檐表每歲花開極盛輒邀同人宴賞道光丙午春其章其相並其兄子肇晉與煦及家弟燾兄子甄奉韓先生來潮爲領袖結詩社於花下名曰棠巢吟社自是七人迭爲賓主互相倡和積數年得詩

六百餘首

韓來潮棠巢吟館社集詩寒食連朝雨尋芳莫問津好花對名友式燕互嘉賓有色非空相無香不媚人高華西府

舊常與德爲鄰戴其相詩社聯驚隱記前因

族祖耘野公笠曾結驚隱

詩社二百年來步後塵座識荊州聲價重客邀彭澤笑言親

忘年會結添幽興名友花開報好春彷彿竹林傳韻事率真無主亦無賓陶甄詩文字初聯飲叨陪座末賓締交成七逸良會集三春室靜簾窺鳥風輕花笑人名言與醕酒一樣味津津

綠雪軒

在楊家潭西畔韓先生來潮所構宅也時與棠巢吟

社諸人宴集其中咸豐間先後延吳大根大澈課其諸孫讀書於此

橋梁

貞豐橋

以里得名在中市河西口跨中江字圩南江字圩明

崇禎七年重修

本朝雍正四年里人重建

普慶橋

俗稱聖堂橋在貞豐橋東澄虛道院前雍正四年里

人重建

梯雲橋

俗稱褚家橋在普慶橋東中市河東口石塊木面乾

隆二十九年里人陶允成募修道光七年先伯父諱保宗重

建

富安橋

在梯雲橋北坵之東跨中江字圩嚴字圩橋旁相傳

有總管廟故原名總管橋元至正十五年里人楊鍾建明成

化十四年重修嘉靖元年又修 本朝咸豐五年里人重建
初係青石面平而無級因易黃石焉有韓來潮碑記

韓來潮重修富安橋記本里富安橋由來舊矣郡志未詳
其始故老傳聞雖云建自前元而無可證道光己酉霪潦
爲苗水勢漫溢橋座土鬆涉者病之經里中善姓募捐於
咸豐乙卯七月迄九月醵緡錢千有餘貫庀材鳩工屏水
卸石橋甃藏碣有四得悉斯橋於至正十五年乙未八月
里人楊鍾報答祖考現生獲福捐資創造其修葺也則於
前明成化十四年又於嘉靖元年撫今追昔逾五百載修
理不過三度工堅石厚當日之不苟於任事如此故董是

役者景仰前軌交相勉勵人無惰容工無懈忽風雨勞怨所不辭而功告厥成因是知建橋之始由於求福則今之躋美前人篤慶永綏當無可量矣橋之西向有隙地一區近居侵佔貽患橋工今償價歸復勒石以正經畫誌不忘也

隆興橋 在富安橋南跨南江字圩嚴字圩平面三袂明成化間建 本朝乾隆二十九年重修道光二十九年里人重建報恩橋 俗稱南柵橋在隆興橋東南南湖之濱初係木橋時修時圯康熙五十年錢王浜朱瑞如改建石橋乾隆五十三年里人重建因水流太直移橋址過東二丈許而橋亦增高

焉

世德橋 在富安橋北跨嚴字圩下江字圩明萬厯間里人徐松泉徐竹溪建 本朝乾隆三十年重修道光二十三年里人重建

永安橋 與世德橋東坵縱橫相接故俗稱鑰匙橋在嚴字圩銀子浜口明萬厯間里人徐正吾建 本朝乾隆三十年重修嘉慶五年又修道光二十三年里人重建

全功橋 俗稱北柵橋在世德橋北初係全姓所建故原名全公橋順治三年里人蔣從川沈從所募修乾隆三十六年里人重建規模較前宏大

太平橋 在後港東口世德橋西堍之南跨中江字圩下江字圩明嘉靖間里人捐建王璧力助成焉 本朝乾隆三十六年重建

福洪橋 俗稱洪橋在後港西口太平橋西平面方欲康熙間里人重建乾隆四十九年重修

通秀橋 俗稱鹽店橋在西灣漾北油車漾南東堍屬元和之中江字圩西堍屬吳江之北友字圩初係木橋乾隆三十九年里人改建石橋

聚寶橋 西灣漾之西口濶而流急嘉慶間先伯父諱保宗創建木橋於此跨化字兩圩高與報恩橋等同治十三年里人

重建

中市木橋 在普慶梯雲橋之間屢圯屢修

青龍橋 俗稱小橋在下江字圩小橋浜口乾隆初年重修

平安橋 在下江字圩寺前村口嘉慶六年全福寺僧律蓮募
修行徑因重建焉

泰安橋 在嚴字圩東垞之大漫口嘉慶二年村人重建光緒
五年重修

小石橋 鎮中凡四嚴字圩有二一在雨花庵後向爲八景之
一今已淤塞一在箸涇跨河房屋之南水流甚急其二橋一
在南江字圩萬福庵東畔俗稱小楓橋一在下江字圩全福

寺東南

俞家橋

在鎮北俞家浜跨耘田港南沙港兩村

四安橋

在鎮北廟浜村東口明隆慶五年建 本朝雍正間

重修

興隆橋

在鎮東北白家浜嘉慶間重建

永壽橋

在鎮東北北錢王浜石塊木面康熙四十七年建乾

隆五十年重修

永甯橋

在鎮東東張家浜雍正三年重建

福慶橋

在鎮東王巷村明成化元年重建 本朝康熙間重

修

鄉村諸橋惟此
環拱而亦高大

流慶橋

在鎮西江澤村流慶庵東南雍正十三年庵僧友岑

重建

太平橋

在鎮西西投氣村康熙元年建

登龍橋

在鎮西雪巷村福神庵東道光二十二年重建咸豐

十年重修

旋新橋

在鎮西南角字村旋新庵東南石塊木面雍正間重

修

仁壽橋

在鎮西南南莊村東嶽廟東康熙五十年重修

皆春橋

在鎮西南南莊村滌塵庵東南明嘉靖二十五年陳

經重建

本朝康熙三十五年重修乾隆元年又建成豐六

年又修

聚安橋 在鎮南許莊村石堤水面光緒四年重修

陶公義渡 在鎮北急水港大王廟前水深港闊且係要津往來病涉康熙初里人陶唐諫設舟以渡行人復捐田三畝五分以食操舟者至今尚存

周莊鎮志卷二終

周莊鎮志卷三

里人陶煦重輯

祠廟

城隍廟

附

賢聖堂瘟部司祠

在南柵報恩橋西門對南湖向

時府縣城隍同殿嘉慶四年里人王殿方等募捐增建正殿
祀府城隍西殿祀縣城隍東殿祀五方賢聖東廊爲瘟部司
祠西廊爲書吏科房頭門建戲臺左右置兩角門規模式廊
非復舊觀矣城隍神具詳府縣志茲不贅 五方賢聖未詳
何神相傳爲春秋五大夫分主五方東方劉康公南方張老
西方趙文子北方史魚中央蘧伯玉明季南湖畔挺生大樹
一本五枝有塑匠見而異之謂枝按五方宜爲神像里人從

其言乃建祠以祀頗著靈異順治乙酉各處舉兵拒 命有周瑞張貴陳打生等藉借餉爲名肆行擄掠將至鎮比及南湖遙見兜鍪環甲者五人立於岸乃懼而退康熙丙子七月大風傾垣破屋人見有冠袍五色神隱現於天際故迄今遇時疫流行則居民各以其方迎神及瘟部司徧巡街巷以禳之後西方神移供於萬福庵旁而祠中遂增祀真人府焉其神或云是孫通 瘟部司像藍面赤鬚擬乘以神爲唐寅亦未知何據

土地祠 在北柵永慶庵山門之右同治四年里人重修按里中土地神爲李明大王圖經載王名明唐太宗第十四子封

曹王爲蘇州刺史有惠政歿於任所萬民留葬立祠梁開平三年吳越王錢鏐奏封昭靈侯封神蓋自此始其墓在鎮西江澤村稱曹王墳地屬吳江故亦爲吳江縣城隍明洪武中詔正城隍稱號 本朝康熙二十五年 敕封廣佑王同治六年 加封普庇二字

東嶽廟

附

火神殿

在北柵全功橋東坵卽周爺廟基也明正

統間周文襄公忱開濬陳湖以東里人立廟祀之 本朝雍

正初就其廢基改建祀東嶽神西偏一椽祀北陰酆都司俗稱楊爺殿乾隆七年增建山門及兩廡二十四年卽於兩廡分塑十王像嘉慶十三年里人緒天一重修 火神向附東

嶽殿東楹道光二十五年里人於廟後增建一殿移像供奉
焉光緒元年淞南營修廟及殿

全福講寺

附

文昌魁星閣

在鎮之西北半里許白蜆江濱初

名泉福宋元祐元年里人周迪功郎暨室章夫人捨宅爲之

景定間杲古行僧闢敎敕賜今額

按縣志載元祐間建清祐二年周迪功郎更新之此

承曹垂璫指歸閣記之誤今從周莊志及增輯掇乘

寺基爲民佔厯朝例不起賦領庵

四一善住

在高墊金園裏

一觀妙

無攷

一永慶一永寧

俱在鎮中

元至正六

年火九年僧古鏡重建有寺僧師坦碑記明洪武中古鏡後
嗣大佑重修宏治中又火僧江旻修之嘉靖初又火三十四
年僧法雲募修里人王璧之力居多有願潤澤碑記萬厯六

年僧道隆重修有周光碑記十年毀於風四十四年住持慈
念徒良能募修里人徐道亨同子御律捐貲助成有繆希雍
碑記 本朝順治三年僧廣明尚朴重修大殿五年楊總戎
承祖捐俸增修康熙十二年僧問月創建指歸閣有曹垂潔
碑記四十年里人陳恆章捐修雍正三年里人沈作霖費揆
一陶琳陳復初助寺僧咸載募千金增修合寺乾隆末僧律
蓮累募得五千金於嘉慶六年重修殿閣并裝金身道光二
十九年大水寺西各僧房俱圯咸豐九年里人捐修大殿同
治十年僧境勤募捐重修光緒元年復出已貲增建靜室禪
房齋堂二十餘楹煥然改觀

以上諸碑惟願潤澤
曹垂潔二記今尚存

寺中主

佛法身三丈有餘本虎邱海湧峯雲巖寺世尊像順治五年楊總戎承祖駐旌寺中嘗過白蜆江遇風賴神佑得免乃發願修理並迎世尊大像於寺殿前舊有出世獨尊匾額卽楊手筆世尊屢著靈異雍正間錢王浜朱象賢遇盜見有大褊衫蔽其母盜不得前其家捐貲裝金併於兩旁塑十八阿羅漢焉 寺中正殿爲禪堂衆僧賴齋飯度日其大東小東西四房俱不忌葷酒平時享用過中人家富室子弟往往集於其中賭博譙飲號呼諸浪四時不絕僧家戒行視若弁髦乾隆中中房僧德琳往主杭州雲林寺席乃命德立爲本寺方丈以各房貲產歸入常住改爲叢林開堂接衆設戒參禪

自是諸僧悉遵規矩陸起仙爲撰碑記及德立歿衆僧爭訟復各立門戶惟飯僧田七十餘畝歸常住仍守禪誦而各房則縱恣如故至道光己酉大水後各房屋散惟禪堂獨存迄今常爲清淨地矣 文昌卽魁星也自俗歧而爲二遂於文昌外另祀魁星相沿已久牢不可破里中澄虛道院玉皇閣西偏有文昌閣康熙三十年道士胡天羽募建城隍廟後有魁星閣面東瀕河僅半楹嘉慶四年重建永慶庵有寶光閣則兼塑文昌及魁星像道光二十三年閣爲大風所傾獨神像無恙同治乙丑家弟然暨同志數人捐貲修葺指歸閣移文昌及魁星像奉祀於中

顧潤澤

鄉進士
字具泉

南溪王君行義記王君諱璧字廷用長洲

貞豐里人南溪其別號也世敦朴茂隱迹於農父達以耿
介篤行著名於時沒後君偕其配袁碩人綜理家政威以
恩濟衆樂爲用故名愈振業愈光食指至千數焉而君願
以專利爲恥一遇歉歲卽折券蠲租遠近數十里內飢者
待食寒者待衣怨曠者待婚喪者待賻以至橋梁傾圯者
待其完寺宇頽廢者待其新凡其所行義聲翕然茲如全
福精藍爲一方祝釐之所余昔講學周溪過而慨之者屢
矣今復至則煥然改觀秋壑雲師具爲余言經始甚艱賴
君捐貲倡衆始獲告成已而飾金身布磚甃繕綺疏則又

倍任其費蓋寺之幾廢而得還舊觀君力居多余惟世之
務財用者大率爲自私計至有路人骨肉而莫拯其飢寒
者君雖素封食無兼味衣無重采履素守約不改其初願
能不恤所有而見義必爲蓋其樂善好施根於天性故積
而能散豈徒冀福田利益而然耶易所稱積善之家必有
餘慶今其二子稱克家而諸孫繞膝歧嶷可愛則天所以
福之者固未艾也余外祖雲莊先生嘗館其家亦時時爲
余稱道之余故知師言非誣而輒記其概如此

三橋文
曹彭書

垂璫

賜進士出身吏部
觀政文林郎

全福講寺指歸閣記吳地莊嚴法界

爲名師主席得佛三昧者不可枚舉茂苑全福寺其一也

建於宋元祐至清祐而周迪功郎更新之景定間杲古法師闢揚大教敕賜今額爲開山第一席明洪武壬戌詔徵十高僧以本寺遠庵爲左善世至嘉靖初遭祝融鞭入天宮而住持法雲寄迹苦空垂心文獻能創始於其前慈念良能師徒繼成之於其後迄我皇清順治戊子戒師懷濟尚朴謐朗值兵燹之餘偏能後先精進廣募檀施再創禪堂重修大殿適都督楊公駐旌於茲夢感神異捐俸奉迎海湧峰頭大像供養殿中今松陵問月大師童年入道純孝性成於癸丑年遵母命奉兩尊人主入寺蓋母夫人得法於靈巖老人西歸時書一偈付師端坐念佛而逝故

師特建指歸寶閣傍爲功德林奉二主於其中長生祠以
供諸檀施造山門建廊廡及築圍牆湖堤并募飯僧田爲
永久計寺臨白蜺江濱水光雲影之中樓閣虛明窗軒幽
豁晨鐘暮鼓與漁歌牧笛相爲應答客至則致趙州茶打
江西餅持瀉山拂子下南泉雙陸問廬陵米價登斯閣也
善念油然而生焉佛告阿難世間少得道者由穢念多故晝
夜有八億四千萬念輪迴無已今大師赤髭白足手持貝
葉十指皆香口吐青蓮纖塵不染豈非選佛場中心空及
第者乎壬子歲過海上余倒屣拜迎踴躍皈依始告余曰
士子二十登第壽至百齡亦不過八十年富貴耳余聞而

惕然惺惺然懼無異大愚三拳黃檗一掌未幾師還山余
每飯不忘也乙卯春偕天翼天季二弟猶子九和訪師於
九龍塢遂同舟至寺見斷梓運甓齋圖經始余與天季弟
樂助成之秋杪古林師來言閣工告成欲勒石紀績屬余
爲記不覺慨然曰南朝四百八十寺烟雨樓臺不知多少
由來迄今屢興屢廢雖曰天意豈非人事哉我師眼爍天
下口吸西江一旦振法鼓新華幢成歡喜園種無憂樹僧
祇共仰梵釋咸歸一言以蔽之曰孝而已聖人以孝治天
下佛亦以孝渡衆生豈有無父無母之人哉在家佛何不
供養能供養在家佛則諸佛菩薩有不護念者乎則大師

功德眞所謂始於孝終於孝者已是舉也大師之高足悟覺師相助爲理而鳩工庀材經營荒度則住持受華山戒煥若師與古林老尊宿也

本房戎上德書

陸起仙全福寺重整禪

林記世統於道道統於教教列爲三佛居其一空門以宗風著代無殊俗姓以祖澤型家所可慮者前賢爲之垂其範後嗣未克永其傳耳則繼起之有人所係豈淺鮮哉郡城東南隅六十里而近有巨鎮曰周莊祝釐之所爲全福講寺趙宋元祐時迪功郎周君捐建杲古法師闡教開堂敕賜今額遞及元明法筵相續代不乏人記載已詳無容贅述國朝初戒師懷濬謚朗尚朴緣巖儉難支權宜析

爨然自康熙丙子分房應教以來未嘗不以焚修爲務焉
仁山和尚懷濬之賢裔也維時謐朗之後有玉山和尚南
進浙省得受雲林寺巨濤和尚眞印而仁山亦復隨參巨
濤和尚分承衣鉢現今玉山爲雲林方丈主則全福一席
非仁山而誰屬哉用是闔寺師徒願將田宅併作禪門復
整叢林以圖式廓遂於 今上御極之三十五年憑諸大
檀那及玉山和尚同推仁山和尚首登法席自後本寺師
徒合爲一支以長爲敘挨次接續方丈公議規條呈請周
莊分巡廳唐公上基鈐印執照并詳請元和縣正堂當公
發蒙立案給示冀垂永久從此開堂接衆設戒參禪次代

相傳一燈永耀則釋氏之繼往開來亦得與儒者之承先

啟後同遵常道於盛世矣是爲記

松陵包含書

附徐稜重塑文

昌帝君金身引文昌爲斗魁六星帝君在梓潼七曲上天
下地兩不相合然自古聖賢往往降自列宿幽則爲神明
則爲人猶晝夜循環之理則帝君之顯靈於梓潼也其降
自文昌可知矣帝君姓張諱亞子其先越鵠人因報母仇
徙居梓潼縣之七曲山仕習戰没人爲立廟七曲山上唐
元宗西狩追封左丞僖宗入蜀封濟順王宋咸平中改封
英顯及元乃加尊號曰帝君是則文昌者天神也木主曰
文昌之神惟以掌文昌府事及人間祿籍故奉祀徧天下

而士子尤敬禮焉我鎮香火在澄虛道院其來雖久而議者恆抱三歎地近羣市非斯文所聚一也閣附玉皇非神靈所安二也且附閣獨低有沈埋抑遏之象三也去三歎謀三利莫如北庵文昌斗魁建平旦主寅寅位東北而北庵在鎮東北得其位也與菩薩不相統屬而遙與關夫子相偶有左文右武之義歆厥靈也市梢閒地内有淨室歲時奉祀冠履畢集可會文可題詠可登高眺遠可密坐談心便厭人也僉曰俞哉遷祠善或曰百年香火一朝遷之恐駭耳目曰然則重塑乃可禮不云乎祭於主祭於祔於彼於此蓋兩求之也由是鳩金塑像之議決予不文撮取

衆議之梗概以爲引布告同志共襄厥事又徐稜寶光閣塑魁星像引永慶庵之供奉文昌也衆志踴躍計必有捐助餘資議塑魁星於向南之寶光閣者夫魁星閣所在多有而褻玩之者亦多似不與帝君並尊抑知魁星同屬文昌宮也按天官書斗魁戴筐六星曰文昌宮六星維何上將也次將也貴相也司命司中司祿也帝君卽貴相乃六星之一而魁星則綜其五而造形者乎今觀赤鬚獠牙桓桓貔虎上將次將之威也右手執筆文光高閃司命司中之判也左手持金若將下授司祿之權也胡裸其體星在衣裳未制之先從其朔也胡青其身文昌建寅寅屬木從

其色也胡錫乎斗胡名爲魁所以明其爲斗魁也然則帝君從文昌而分魁星乃文昌之合也奉帝君不當奉魁星歟或曰魁星旣與帝君並尊何可偏其位於北廂然而非偏也在地形則東向爲正在定位則南向爲正各居一閣各自爲尊東向者挹震方之生氣南向者取離照之文明似無不可或又曰閣乃衆姓所建而今一文昌一魁星跡近於佔士輩鄰於專是又不然按箕疇五福魁星皆得其權一曰富司祿主之二曰壽司命主之三曰康甯則上將次將能祓除不祥驅蝗逐疫斯康甯矣四曰攸好德則司中能調人性情使人爲子孝爲弟悌言忠行信斯攸好德

矣五曰考終命富壽康甯而攸好德則考終不待言矣故
凡求財祿者求長生者求消災者求賢子孫者皆宜崇祀
魁星勿徒見文筆之高揚而忘其金之黃斗之量也敬參
末議以俟詢謀之同

永慶庵

附

四義士祠

在北柵俗稱觀音堂元至正八年僧智

修

縣志作
志修

依里人沈萬三乞水西田數畝結茅於此自元及

明時有修葺崇禎元年僧本覺出貲置常住田五十餘畝又
購經論數千卷建閣以度之里人徐御徐韶律佐成焉有劉
錫玄碑記 本朝順治間僧衍微增置田畝改爲十方禪院
府縣志俱稱 有李模飯僧田碑記 碑爲李仙根
書今無存 後田畝漸盡
十方禪院

無力接衆仍稱永慶乾隆十七年僧能綏暨徒志堅募捐重修並建文昌關帝兩閣五十八年僧明初又修道光十八年後殿圯二十三年秋大風兩閣俱圯光緒初正殿亦圯今僅存山門及北偏觀音殿耳 四義士不詳姓氏 國初有劇盜四逸至鎮官軍責民縛送弗獲則屠舉鎮惶懼時浙中一醫攜僕寓此與里人某謀以身代有新安客亦慷慨與焉飾爲盜就戮於軍門而眞盜轉匿他所荷池竟漏網此事章臚龍載於擬乘並弔以詩贈每讀之輒歛歔太息以爲吾里二百餘年之休養生息沐浴承平皆四義士之賜也雖百世馨香未足以報願聽其湮沒而不彰乎同治十三年就庵北廢

基所構懷善局公所之東旁屋三楹葺爲祠設四義士主以祀之 庵中於雍正十一年春曾設施粥廠故殿左有李邑尊世金所給俗厚風淳匾額左廊有陶剛惠施粥碑記附錄於後

劉錫玄

邑人賜進士出身亞中大夫山東布政司參政兼按察司僉事奉敕整飭霸州等處兵備永慶

庵佛閣法藏常住田記貞豐爲茂苑東南瞰洪波巨浸越絕周遭石尤噌吰湏洞灸人行旅欲來布帆蘭槳如墮危崖仄棧平沙曲流蒼烟灌木處處相似居人往他所前阻浩渺箐遠林密如出深山中野棲谷飲苾芻雲水雅相宜也勝國至正中衲侶智修樂其風壤依里中富人沈萬三

秀乞水西田數畝腰鎌辟荒抱茅翳影天地兵燹屢毀屢興顯皇帝時武唐大德仁亮同徒智奉柱杖偶經徐居士道亨與子徵築室護經援止分衛堦戶息光道價隆重其徒本覺少以頭陀井曰薪水辛苦忍垢不洽文義監院憫其迅勵惻惻俾紹法嗣參訪深隱定慧開遠脫落利養緇素歸心四方之士輦錢穀祈禪誦者戶外趾相錯也意不忍逆人善風雪滿溪赤足走鵝以故疲飢而病病久積薪待盡餅笠所餘買田五十餘畝白縣官里長者捐守常住悉捐儲錫市經律論若干卷將樹閣以覆之余友徐御與律作求先世聚族經緯本覺言人大富則違慝不省大貧

則貧妄不免是田以贍後人足矣又云儒釋無二學有二境釋子不力田輸租荷戟扞圉而又蔑知見迪人助王室動神化是僂民也今吾儕日衆生民日匱苟無真人一振刷之吾道其替乎於戲學士大夫憂民勤國明學術以持世運者幾何人耳懷抱之未試或蒙禍以逝不如世外之人克遂其業也異哉若聞道者也病殆矣身之不恤皇焉田疇以及門人典實以廣津梁可謂忘我矣雖然聞之坡公有一念在卽爲塵勞上人買經舍是田已同於未舍通微辨才默然獨坐同於愚夫聞經而悟悟後何經同於未悟此爲上乘說也迦葉作務五十年鹿苑有會則聽阿難

之諮詢非無聞也不勤勞也故蚩契南能確麥於黃梅傳
業而去發之者有尊宿之神秀故可免鉛槧之習耳聖人
師無文賢人師有聞欲見阿難神秀者則經傳中有二人
在無徒耗其田粟也

松陵翁
名鯤書

章騰龍弔四義士詩浙醫云

將令如山岳荏苒肯就擒回生憑隻手代死有丹心旅骨
江南遠鄉魂浙水深只今垂白叟凜弔欲沾襟醫僕云賢
主追隨久萍踪浪作家青囊遺澤國白刃冒天涯赴義名
雙美成仁事並彰遊魂歸未得蜺水雨風斜里民云恐教
焚玉石威令敢支持合里全生日微軀就義時非關妻子
計甯爲利名馳俠氣流桑梓傷哉食報遲新安客云新安

多少客肝膽此君存片刻捐軀念千家活命恩蠅頭營薄
利盜藪憑孤魂大德應難報詩成滿泪痕附陶剛惠施粥
記 皇帝御極之十年歲在壬子說者以爲干支偏屬恐
有水災秋七月海若爲患風濤大作濒海之民爲魚吾地
去海差遠僅免漂沒然田禾被淹民大苦飢自冬徂春餒
餓殊甚於是里中好義之士醵貲施粥聞縣舉行設局於
永慶禪院令同里附近四五里內貧乏戶先期詣局核實
注簿給籌若票以爲左驗自三月一日始至四月十日止
每日所賑率千有餘口午夜舉爨清晨散糜挈鉢而來者
魚貫而入舉欣欣然實其器以歸始事之日邑候李公爲

之給榜告諭涖局褒美事竣更製俗厚風淳匾額以嘉乃
功同事諸人悉心盡力共濟時艱不求虛譽不容纖私咸
食於家以襄厥事當值之夕不遑假寐由始迄終盡瘁不
辭其爲粥也舂揄必精簸揚必淨淘洗必潔炊煮必宜其
分給也大口小口有差已發未發有記罔或誑冒靡有闕
遺誠盡善而無弊矣因念天行有定人事宜勤自先大父
正吾公倡義施粥以來距今六十餘年今斯役也自非建
議有人樂善有人協謀贊成有人豈能以美意運良法而
使羸老飢黎得沾實惠乃爾乎是可爲後人勸用勒諸石
以垂不朽

清遠庵

附

劉公祠

在南湖之上城隍廟西初名永甯俗稱三

官堂唐時爲佛堂宋淳祐間僧古德始建殿宇明初兵燹僧
玉琳復興之萬厯中又煥崇禎十四年僧照音重建 本朝
康熙四十七年僧曉一募修雍正九年僧慧傳出貲重修並
築圍牆有徐鎬碑記乾隆中僧蔭雲募修復增置常住田有
陸起仙碑記五十六年里人捐修道光十五年里人葉春煦
鄭維嗣募捐重修同治元年設局庵中留養難民繼乃以粥
廠餘貲重修頽廢 擬乘及周莊志載清遠庵始僅一椽乃
劉公禹錫寓室民懷其德去後奉爲佛堂此事於府縣志無
攷然公之刺蘇也遺愛在人當其謝事優游而覽勝煙波來

此信宿亦事之常耳夫甘棠猶弗忍翦而況所寓之室起居飲食於其中者乎民之護此一椽也宜也顧不以爲祠而以爲佛堂者何哉蓋建祠必請於朝其時公方爲執政所惡驟請建祠勢必不行民以爲公佛也祀佛卽所以祀公也何必祠雖然當時可不祠而今則不可以不祠同治初里人旣以粥廠餘貲修葺清遠庵照乃與同事諸君議於庵中設主以祀公云 庵中有明季檀護楊公西泉像楊公里人名及事實均無攷相傳人稱爲楊土地後港楊家潭亦以公居得名云其像初供於庵西先月樓

徐編碑記後鐫註云明季檀護楊公西泉之像俱奉西樓

降壬午樓爲巡司署遂移供前殿今則供於劉公祠旁矣

徐鏞清遠庵常住記里之南有招提曰清遠庵面湖背市
翛然出塵山門亦臨湖東嚮塑龍王像鎮焉進門南嚮前
爲關帝殿中爲水府三官殿後爲大悲殿殿皆巍敞法象
輝煌庭樹蒼翠參差前殿庭尤開廣週築牆垣大悲殿西
爲先月樓上下軒豁樓前有精舍可以習靜梵修殿之東
爲客堂爲臥室後廩前厨煥然俱新聞是庵雖始於有唐
實興自趙宋高僧古德開其先元白涵徹兩禪師持其後
氣象固已不同然規模尚覺狹隘再傳爲曉一師志欲恢
宏時有未逮又傳爲慧傳師夙夜在心閱三十餘年經營
構造始改前觀憶康熙庚午余是年初預鄉闈先期假西

首樓肄業見庵中室宇卑陋後殿梁柱蠹腐前殿迫隘惟正殿稍完善時慧傳尚幼住持曉一師與余言常太息蓋欲大爲整理而工程浩大物力維艱用齋志以歿慧傳師繼之焦心瘁力食淡衣麤庵舊有田若干畝每歲贏積勤禮經懺又善針灸隨所得一入公藏不妄費雍正九年迺選日鳩工垂二年始竣事費浩繁矣而庵田先且以漸而增又葬曉一師於虎邱之東買田營建踞林巒之勝不惜重貲旋因怡親王立祠於茲官償地價喪竟遷歸慧傳師心脚至痛兼積勞久染患不起於乾隆元年八月初十日告終越五年法嗣具彰始得地葬曉一慧傳兩師夫以

前人之創建如此其難具彰宜念慧傳師辛勤一生於禪
門立德立功實非易務期恪遵師傅精嚴戒律無使人
得以指摘瑕疵斯住僧之梵修既勤而檀護之維持自力
否則福堂清淨難容不法之徒衆議昭彰深爲可畏具彰
勉乎哉世兄陳琬章陶惟一屬余作文鐫碑垂後余以衰
廢辭不獲已特援筆而爲之記

里人沈天相書陸起仙常住田記

夫易有之曰財以聚人義以正民謂非二者相需不容偏
廢卽在空門其所以承先啟後者亦莫能離乎是南湖之
濱有庵曰清遠自古德興建於南宋不乏善繼僧徒間有
不率教者必被屏斥故延及熙朝如元白涵徹曉一諸

師皆能確守清規者也迨至戒師慧傳更將殿堂法像修造而鼎新之庵舊有飯僧田亦且以漸而倍增里人爲之立石以垂不朽論者謂慧公銖積寸累迥殊非分之財是必有賢裔持其後者陰雲戒師慧公之裔孫也於今上御極之二十三年始爲住持常住遺田不逮十之三蔭師一以慧公爲法頻年禪誦兼積經費於是整金容葺殿宇凡屬廢墜逐一修舉田復稍增彌自刻苦疲羸而病於示寂時遺命徒孫恆修以及麗乾將常住膳田并舊所遺其二十餘畝呈諸官長鈐印給示徧告里中護法將勒石垂後恆師倩余記其事余謂師曰釋氏超四大離五蘊一瓶

一鉢到處生涯何以資產爲師得毋託迹空門而猶未空
一切耶恆師乃述蔭公之言曰有常住不能無徒侶有徒
侶不能無衣食況乎廟宇之傾圯不能無修理金容之剝
落不能無整飭與其募化十方而莫給孰若取資常住而
可憑乎政恐後之人弗克誠心是守是不特空門之不肖
抑亦當世所共嫉也欲使賢者知所守不肖者懼爲非則
保斯田於無失墜者勒石之爲功大矣恆師述竟并涕淚
以請余感其誠遂爲之記庵在前明有高僧曰玉琳載邑
乘康熙間有巨平和尚工詩著且留稿歿葬漁洋山慧公
有徒曰道立習八法喜爲詩曾以積輿助慧公惜早世是

人壽金卷之三
二
皆前碑未及誌者并附於此

里人沈偉烈書

澄虛道院

附

文昌閣關帝閣

在鎮中市俗稱聖堂宋元祐間

建明嘉靖間里人王璧建儀門

本朝康熙二十五年道士

胡天羽募建玉皇閣三十年又於閣西建文昌閣乾隆十六

年道士蔣南紀於山門外建關帝閣閣臨普慶橋明時院西

無人家橋有雀竿懸燈以照西灣之夜泊者國初以來民

居稠密西柵漸成列肆燈久不設矣道光二十三年閏七月

玉皇閣前古柏一株爲大風所拔殿角亦傾道士郭克修出

貲修葺相傳院有五井今其一在殿前一在院旁人家僅存

此二者山門外一井已湮塞而石欄尚在鐫曰義井旁有宏

治己未年置六字餘二無攷矣 關帝之祀歷代崇奉至

本朝而 敕封爲忠義神武靈佑仁勇威顯關聖大帝咸豐
三年復升入中祀禮節悉如帝王祀典之隆亙古未有也里
中關帝閣有二一在永慶庵後道光癸卯爲大風所傾一卽
在院前咸豐庚申閣將圯乃移神像合祀於院內文昌閣

張冷重過澄虛道院有感詩太湖下瀉由三江三江分派
脈絡長縱橫貫注稱澤國滌洞至此環仙莊遠水重重作
外護菰蘆蒼蒼飛白鷺幽深福地似蓬萊燦爛雲霞投野
渡當時開創真人宮金闕輝煌丹竈紅世人移入作仙鄰
桃源竟與塵凡通煙火生聚成邑里魚鹽貨貝來至止佔

客帆橋集畫橋元都館外開成市昔者道士沈與王示我
玉笈琅函章我心遂慕羨門子三年寄迹鸞鶴旁別後桑
田變滄海 皇朝頒歷四十載此日重來歷舊遊殿宇摧
殘金碧改二公羽化歲月多思之不見悲如何空庭徙倚
未忍去清風明月還來過法侶何人繼其後胡君天羽獨處
守破漏瑤天徐聽步虛聲玉笛新翻降真咒出門森森江
湖邊憑君長往猶流連我亦欲爲世外人相挈滄洲淩紫
煙

桃花庵

附

猛將堂

在東莊地庵僅數椽相傳牧童疊石而成

故又稱牛郎廟康熙五十二年里人徐渾募捐修葺乾隆間

里人重修道光初又修咸豐八年僧修載募修庵後有普同

骨塔

詳家墓

庵中向設惜字局至今因之

詳公署

東偏爲猛將堂

會典載猛將軍係元指揮劉承忠元亡自沈於河神能驅

蝗世稱劉猛將軍雍正二年奉旨廟祀咸豐七年敕加

保康二字封號又姑蘇志及府志皆云神爲劉銳宋將劉錡

之弟歿而爲神驅蝗有功雍正十二年詔有司歲冬至後

第三戌日及正月十三日致祭而王穉登修廟疏云是劉光

世之弟及觀怡園雜錄載宋理宗景定四年敕書則竟爲劉

錡矣神爲田家所崇奉里中祀之者非一處惟此最尊大香

火亦較盛庵之南近南湖濱有興隆廟鎮西瑞福庵旁有劉

王堂皆神祠也

景定四年三月八日敕書畧曰飛蝗犯境民不能驅吏不能捕賴爾神力掃蕩無遺上感其恩下懷其惠爾故提舉江州太平興國淮南江東浙西制置使劉錡今特敕封爲揚威侯天曹猛將軍之神爾其勿撫庶民血食一方

萬福庵

附

西方祠

在西柵壩基之東初名衍度俗稱新庵又

稱撥轉廟因其北向也康熙五十七年建嘉慶十四年重修同治四年里人捐修五年礪岸又圯庵僧措貲修之其西偏爲西方神祠西方祠亦康熙五十七年建移供西方神像於中並祀勸善大師及都天府焉相傳大師爲圓覺都天府

本中央神像竊爲漁人迎去久之里中已重塑而漁人忽送歸因稱之曰都天府

雨花尼庵 在東莊地南本徐氏家庵里人徐汝珍同妻陳氏建供觀音大士像延尼萬安爲住持並以甫里淨業庵修齡爲徒皆勤於課誦康熙五十九年殿傾議修汝珍曾孫穀捐貲倡募迨延鋪廷鑑助成焉乾隆十九年尼永明募建斗姥閣道光間尼坤泉募修光緒元年鄰居火延及旁屋數椽尼蓉生出貲重建

萬壽尼庵 在北柵篾竹埭東康熙十九年里人吳茂芝同妻徐氏重建延尼普順爲住持供白衣大士祈嗣者萃焉四十

年藥師閣圯尼靜修募建茂芝又助成之雍正初殿宇漸傾
尼徹如募修有迺濤碑記嘉慶十二年里人蔣甯氏朱陳氏
捐修同治十年尼萬興出貲重修

迺濤

貞豐里九十
老人字安瀾

重修萬壽庵記俗姓有子孫望其昌熾

佛家何獨不然貞豐之萬壽庵奉白衣大士凡祈嗣者萃
焉螽斯麟趾集慶於種德之門而庵之奕葉相傳每出賢
子孫則佛之與俗不相侔也而實相似庵初建不詳矣順
治間廢康熙十九年里人吳茂芝同室徐氏重建延女僧
普順爲住持康熙四十年藥師閣圯其徒靜修葺埋茂芝
亦資助之雍正初庵復傾頽徹如者靜修之徒也慨然以

恢宏祖業自任叩募善姓晨昏不懈至雍正七年凡前後
殿山門廊廡一一告竣規模加廣於昔朱櫺碧瓦煥然一
新計捐助外罄所積不給於供權棄靜修所置常住田十
畝足之費共六百七十餘金閱數年營葬其師於吳邑文
殊寺左與錢二千屬寺中生息辦賦乾隆十年出經懺紡
績費仍置青邑田一十三畝有奇作常住供佛飯僧千年
香火之計詳其事蹟是誠可謂賢子孫矣卽求之在俗未
易臻此夫佛之爲教渺遠難稽乃大士以慈悲之願爲善
人綿似續感應之神旣近且速而其佛弟子亦能紹述先
志不僅以暮鼓晨鐘和南膜拜爲事又豈尋常鹿苑所能

彷彿哉余故嘉其意而畧敘顛末如此

里人鄭斌書

瑞福尼庵

在通秀橋西南俗稱娘娘廟供碧霞元君三尊珠

冠袍服泰山之神也康熙九年重修因近米市抽捐較易道

光咸豐間屢經修葺

劉郡王廟

在鎮之東毘廟僅一椽神像白面長髯宰輔冠服

而手執一鎚未詳其名字同治八年重修

保壽庵

在鎮之胡家圩白蜆江口供觀音大士香火極盛同

治十三年重修

大王廟

在鎮北急水港北灘陶公義渡口乾隆三十六年里

人重建咸豐十年圯會典載王姓謝名緒宋浙人行四讀書

金龍山宋亡死節明封金龍四大王 本朝累加顯佑通濟
昭靈効順廣利安民惠孚封號周莊志載王爲曾稽諸生以
戚晚故不仕元兵入臨安謂其門人曰他日黃河倒流是我
報讐之日也赴水死明興與元將蠻子海牙水戰於呂梁元
踞上游太祖見神將三操劍揮兵黃河遂逆流而上因乘勢
衝突元兵大潰太祖呼曰神將留名以便封爵夜夢神來告
曰我謝緒兄弟行居四葬金龍山下今日爲宋報讐非請封
也偕來者南木二將軍太祖乃敕封爲金龍四大王於黃河
上立廟祀之

光緒八年冬附近
諸村捐貲重建

甯慶庵 在鎮北耘田港康熙初鎮人陶唐諫同妻閻氏建爲

晚年焚修之所茂林修竹蔚然深秀旁有隙地數畝可種菜蔬守庵者資生焉今已零落欲傾矣

善慶庵 在鎮北廟浜村初名觀音堂明嘉靖三十三年重修有碑記在庵前已剝蝕不可辨左偏東嶽廟係錢王浜村人所建

彩雲庵 在鎮北韓鎮村乾隆間重建同治間重修庭前有銀杏一株相傳明季所植也

報福庵 在鎮北祈莊村宋淳祐間府志作咸淳村人陳法源棄家爲僧創建此庵有寶幢敎院僧若源碑記 本朝道光初僧方祥重建同治九年重修

若源

平江府寶幢賢首教院住持傳賢修宗教觀遠山

基莊報福庵記原夫法不

孤起起必由境透境徹心存乎其人姑如闔閭城東長洲
管下去城五十里曰基莊有頭陀道者陳法源當里人也
本有家累素勤稼穡性稟狎善一日未疲晝愁於家寐見
佛尊巍特相好金容環列人天各司典執如世尊官森嚴
侍衛而陳法源亦預其間謂如尋常趨承執事寤乃深思
何臻異夢莫非夙善所感爾乎卽於次日告及妻兒各求
自度吾誓標心奉佛不樂火宅共居徐有親識諫之不聽
令妻費氏改嫁遠鄉已逝女氏出室亦亡有子其時年將
冠歲聽從投禮嘉興之思賢依遠師得度爲僧法名善來

俗緣旣屏塵慮念亡子然無口參遊名利抵府城覺報禪
刹禮拜訥堂辯長老化風甚振素與之昧一見契遇欣然
而留不日躬爲剪髮摩勵執師弟禮自名法源卽淳祐改
元矣至七年三月辭師回里訪故金四三道相言契濶全
論世諦慨一方陳湖之濱三十里烟水茫渺僧道往來正
爲宏道而無棲息可存心乎遂以隨身錙累置季氏極田
一畝二角墾土築基處亦幽閑金氏從與其成助木其構
砌立小庵覆以苦草晨香夕燈修心冥坐仍回覺報啟白
余師爲立報福庵名求援朝賢趙侍郎口諱希靚大書其
扁徐後道者王妙因棄累投禮法源爲師願求資助俞妙

勤而其次皆負囊相從共力耕穡淳祐間添置季氏終字
號田壘廣其址改剏庵宇後立佛亭東安厨淨中庭穿堂
前後相貫規模漸序承府郭張員外捨錢粧塑觀音垂終
招法源囑以埤田三角兌本庵片隙之地瘞予骨灰助租
五石以供香油至寶祐間就買埤田鑿池栽藕便一方骨
殖散颺建業莽二十年而道衆力勤耕耨以給庶患法源
泯沒以強凌弱而不知奮拳克苦創始之艱余承乏寶幢
經遊宿託而陳法源備述其艱苟不爲之記固然以審前
之作余喟然曰事非緣不立緣非事不彰立幢刹容方來
續佛慧命乃非細事皆夙願力非特苟已而不利人也故

爲記畧述有部符府據昭示其來云爾

中散大夫高不禱
題蓋擬乘誤作高

不禱
撰

永壽庵 亦在祈莊村俗稱聖堂光緒四年重修

興福庵 在鎮北三朱浜庭前有古柏一株

曇華庵 在鎮西北雙廟村庵在港東而港西又有土地堂故
村因以得名同治十二年重修後庭大銀杏一株數百年物
也

思敬庵 在鎮西北張家港一名師子禪林明天啟間僧閻虛
善醫有鄒文萱者因疾得其療痊遂出貲助之復請大覺寺
僧卓庵廣爲募捐創建此庵村人張柏泉寶贊成焉 本朝

順治十四年吳端仁愉爲撰碑記而字多剝蝕康熙初村人張士隆於大殿東捐建關帝閣有馮檢討勗隸書楹聯道光元年閭圯重建二十一年重修大殿庵有福田碑二一立於康熙二十六年一立於雍正三年所鐫皆衆姓助田之數庭前銀杏一株大可五六抱枝葉甚茂

敬福庵 在鎮西北高田浜俗稱北觀音堂咸豐間重修
積善庵 在鎮西北王家浜俗稱南觀音堂同治間重修

晏公廟 在鎮西北王家浜南白蜆江濱道光九年重修同治六年又修路史載晏公名戍仔江西人元初爲文錦堂局長登舟戶解立廟封都督大元帥明洪武初以其陰翊海運又

封平浪侯至樓怪之說趙翼詹曝雜記辨之又李漁比目魚曲則以十月初三日爲公誕辰云

詹曝雜記晏公廟昔人以爲江中棕繩許旌陽以法印擊之遂稱正神云按國憲家猷載豬婆龍事有老漁問其姓曰晏也明太祖曰昔救我於覆舟山云是晏公乃封爲神霄玉府晏公都督大元帥命有司祀之而不云棕怪

崇先庵 在鎮東北白家浜錢王浜之間宋咸淳間僧壽崧創建 本朝嘉慶十四年村人朱掄元捐修泐石殿前道光四年重修同治十年又修

保福壽庵

在鎮東北質洞村康熙間重建光緒四年重修

崇遠庵 在鎮東北潁村宋咸淳元年僧朽庵自終南山來此
愛水木清幽創建是庵凡殿堂門廡鐘鼓樓閣畢備爲遠近
鉅觀當壘基時所攜黃犬亦銜土助勞實有祥異故布金者
雲集焉元末毀於兵燹明洪武十七年僧信守誠一重建成
化間又比僧德淞智安募建增葺克復舊規兵部侍郎陸完
爲之記今其碑無存矣 本朝乾隆間重修

積福庵 在鎮東北秀王浜光緒二年重修

總管廟 在鎮北天花蕩濱金家蕩村同治四年重修祀總管
金昌暨其祖和父細子元七從子應龍孫某某其墓在廟後
西北數武碑石雖存字已漫漶按府志載廟在蘇臺鄉貞豐

里又云嘉慶十五年蘇臺鄉總管廟入祀典惟列在長洲縣意編祭銀亦歸長洲也

重興庵 在鎮東北王家灣舊名介福同治元年爲粵賊所燬光緒五年重建改今名

普化庵 在鎮東道堂浜左有東嶽廟同治間重修

眞武廟 在鎮東朱家河乾隆初建光緒元年重修

雲隱庵 在鎮東王巷村宋咸淳間僧如隱建 本朝康熙十八年僧樸如重修道光二十九年僧楊庵又修

北聖禪院 亦在王巷村俗稱北聖堂康熙三十三年重建嘉慶四年重修又有南聖堂僅一椽在村南湖洲中

石神廟 在王巷村東南里許宋建祀韓蘄王部將石仔同治元年粵賊營此廟燬九年重建而神像無存矣廟右爲衍度庵有明季福田碑

福壽庵 在鎮東南馬家浜道光十八年重修

勝因庵 在鎮西江澤村俗稱聖堂相傳爲聖姑夫人廟基聖姑者府志載晉王彪之之女也元至正間改建明季僧頴先重修 本朝康熙四十年重建道光二十六年又修

流慶庵 亦在江澤村元至正間僧智福建 本朝康熙十七年僧畏如法如重建庵右爲曹王墓故相傳元以前庵卽祠宇也

四相公廟 在鎮西西蒲塘相傳神爲朱姓敕封英烈侯凡患
瘍者俱往禱祀故香火極盛

德慶庵 亦在西蒲塘明季建今幾頽廢

青蓮庵 在鎮西西投氣前殿乾隆四十六年建後殿已圯

全福庵 在鎮西北黃墩港道光三十年吾鎮全福寺中房僧
道宗住持此庵咸豐三年募建前殿並圍牆泐石壁間

福神庵 在鎮西北雪巷村舊名獨雲庵道光二十五年村人
沈楸慈感夢重建左偏增文昌閣右仍爲劉王堂并架樓藏
其家刻書板有朱珩碑記

朱珩

涇縣人賜進士出身日講起居注官右春
坊右贊善上書房行走前翰林院侍講

吳江修改

獨雲庵爲福神庵并建樓藏書板記松陵吐納具區水溪
港千計惟白蜆江最著江在縣東南繞而北委紆瀟漾旁
擴大圩爲雪巷村今沈君翠嶺所居蓋明崇禎間遷自浙
之歸安近地先有獨雲庵莫詳創始厯二百餘年漸致頽
墮君儼鼎新焉忽夜夢苾蒭入謁趺坐誦佛號詢知披袈
八垢福神庵間君結善緣故來君諭以本境獨雲庵方立
程式難兼營頷曰卽此可惟祈速構頂禮去比寤念八垢
道界嘉禾固密邇遣人尋訪乃絕無是庵顧何以甫發愿
而僧語適符彼云卽此者又何邪天下有夢寐而通神明
者或謂荒誕不盡然高宗夢得傳說孔子夢見周公古帝

古聖勿敢論若左傳一書言夢應者屢矣至後代夢丈六
金人則釋家亦有之君之夢積想成因似役不可緩乙巳
春遂飭工改造距前址稍西山門面陽門內殿虔奉關忠
義次殿供諸佛其左建文昌閣而右爲劉王堂仍舊號但
未知劉王奚指疑卽毗俗競崇之劉猛將軍如錢竹汀少
詹集載嘉定城外廟祀紀將軍信而稱紀王歟茲舉也高
貴獨輪圮口重煥逕易名福神留誌夢兆雖然君初心殆
非僅是也君素嗜刻書成帙甚夥棗梨鐫本充溢棖柄而
懲昭文張氏之學津討源板燬於火矍然求善壤以貽乘
庵之興急就乾隅別築樓三楹闕濶朗爽廓乎能容移羣

書板皆實其中擇謹慎緇徒常司守護庵曩存田六畝有
奇更增若干畝薰修者毋虞乏匱從來浮屠之宮苟無厚
蓄奸蠹罕覬縱遇紛擾往往幸全且託處必閒曠虛靜專
踞一區遠離塵垢殊不類市廛櫛比連簇蜂窩偶弗戒鬱
攸啟禍動吁焦原故近時阮雲臺相國於西湖之靈隱焦
山之定慧皆置書藏正以鐫遺編而防猝患也然則君仿
厥製誠慮遠而謀周而豈漫拘泥象教希庇佑者哉功既
竣屬余述事爰作記俾昭垂庶幾奕世下庵也樓也藉得

與白蜺江流並美

吳縣吳
根書

清隱庵

在鎮西之北印村康熙初僧歸一自同川懺院至此

四十六年村人宋文元募建前殿越明年歸一與其徒道立
創建後殿及山門圍牆乾隆中僧覺空重修四十一年火覺
空復次第振興至四十六年還於舊觀鎮人陳晉爲撰碑記
空翠禪院 在鎮西蕭莊黃泥浜之間本名辛庵康熙二十六
年僧慧生重建乾隆五十七年僧清元重修道光十七年僧
松亭積醫貲復加修葺張承基爲撰碑記同治九年又修
崇善庵 在鎮西南長渠村 國初建同治間僧素成積貲置
常住田九畝有奇

泰甯庵 亦在長渠村光緒三年僧洪學募捐重修

旋新庵 在鎮西南角字村雍正十年重修道光六年又修

萬壽庵

在鎮西南大港村同治九年重修

法華庵

在鎮西南吳家埭乾隆五十七年重修道光二十一

年又修

淨土庵

在鎮南許莊村宋建明天啟間村人楊守愚助僧大

量建觀音樓并施田畝崇禎間僧月滄智觀相繼募修有無

名氏碑記今樓已無存矣

村中於乾隆五十七年曾築隄

防水陳紹昌倡之吳江費振勳爲之記其碑在庵左殿壁茲

亦附錄以備留心水利者攷焉

無名氏淨土庵記吾邑水之大都會也右濱五湖左接東

海浙水經其南江流達於北凡大川巨瀆包給於平原沃

野間者弗可勝記以故水脂浸潤土膏肥饒財賦之盛甲東南都邑而二十九都則首推膏腴之區許莊又都中田最著村中人貧者相足衣食富者亦節儉有禮暇日諸父老環集庵內作佛事謂人生無事爲福得念彌陀終年誠如西方極樂世界庵名淨土建自宋朝數百年爲一方香火初僅有祖師祠無佛院塑莊嚴寶相令善男子皈依及大量師居之欲廣里人作福地里人亦欣然從之楊居士守愚領袖縵善衆所施架一樓立觀音像體裁甚潔且固巍然峙錦口繡壤中四望烟火萬家雞犬音相接竹樹桑麻景色錯出於廬舍旁一覽而竟禾麥縱橫田間四時異

象禽鳥組織於其中煙雲繚繞於其上去來變幻早暮殊
觀出世人得以安棲向道人俱可樂敘矣楊居士心自喜
捨青邑烏字圩田六畝爲衲子供養具二十餘載大量欲
立石傳其德銘其功疾故未及越數年延月滄師住持滄
師西逝法嗣智觀相繼募諸檀越殿宇復新奉香火梵音
不絕具重念楊居士善行大量師至情月滄師衣鉢遂欲
繼承其事奈履衲蔬粟之需僅可禦寒免飢無他餘物邇
年天災流行苦益倍萬未克爲此茲幸逢豐歲諸善信多
好扶助本懷正不容不自慰也鐫之石以垂永久使後人
知居士發願不惟積善於身且以成人之行必務全惟口

事化感衆生庶可消受此福不然享居士之德負居士之心亦烏能自安飲食乎哉雖紫竹之光風綠楊枝之甘露難滌除衆業證入菩提滄師遺屬法裔法界索文於余余遂樂爲之記大明崇禎甲申歲次清和月附錄費振勳賜進士出身中憲大夫戶部四川主事兼翰林院檢討廣西提督學政許溪築隄記周禮匠人爲溝洫視地防稍溝必廣倍於善防水厥之濶最詳廣與崇方其網三分爲一大防外網俾隄厚水不能潰其制與稍人稼下地呂防止水相表裏江邑隸吳郡北距具區東連淞渚古稱澤國霖雨成澇滋患實夥則所謂呂防止水者亟宜講也許溪在邑之東隅窪下田什之三四其地經

下輕雨圩田不下五百餘畝比年遭淹沒顆粒難幾壬子
春宗文陳紹昌先生倡籌備澇之方呂成嗣考松年老先
生志先是松年數欲築隄禦水逡巡不果蓋齋志有年宗
文因與各圩圩長暨里中長老議將築隄念田賦爲天
庾攸關是舉非一手足烈遂具詞請於邑侯書田呂公旋
允其請並飭督築里人咸踊躍趨事諏日起工測廣厚量
高下倚畚揭庀材料次第以舉畧仿古匠氏遺意隄長可
三里許廣可丈餘東鹵接壤築岸可半里南北樓門築壩
可二十餘丈旱則灌注曰溉其中澇則洩瀉以捍其外功
成而壤盡膏腴晦可歲得一鍾是能上供國賦毋虞逋

負且水患永弭業佃均賴其利則斯役誠意美濃良而古
咎下地曰防之制於茲爲烈居是里者可曰服疇食德訢
然想始事者之善籌矣事既歲宗文復撮其始末郵遞至
粵西官舍屬余爲之記余嘉其利之溥與其意之誠烏可
以不文辭於是乎書

瑞慶庵 在鎮南西岑村乾隆十四年重修咸豐十年又修
長生庵 在鎮東南吳家村庵瀕元蕩道光二十三年重修
關帝廟 在鎮東南蕭田村光緒二年重修

雲谷庵 在鎮東南寺巷村舊名關帝廟乾隆二十六年重修
咸豐五年又修殿壁有衆姓敬禮華嚴經小引碑乾隆十年

鎮人費張魁題廬安國書

三元庵 在鎮東南楓里橋道光二十五年村人郭用霖同子耀重修

敬信禪院 在鎮東南二高港本張季鷹祠宇院東卽其墓也後改爲禪院而中仍供季鷹木主咸豐二年重修

永福庵 凡三一在鎮東南官字圩同治間重修一在鎮西同字村乾隆二十七年王馬氏重建咸豐六年蔣徐氏重修一在鎮西南三家村庵瀕南湖同治元年九月爲粵賊所燬五年重建

東嶽廟 凡二一在鎮西南南莊村光緒四年重修一在龍涇

村光緒元年重修

土地堂 凡四一在鎮北繆浜村一在祈莊村一在鎮西北雙廟村一在鎮西西投氣

觀音堂 凡六一在鎮北趙浜村一在鎮西北林家浦一在楊家浜一在鎮東北錢王浜一在北朱家浜一在祝家田

三官堂 凡四一在鎮東北東管村咸豐四年謝恆山募修一在鎮東匠人浜光緒四年重修一在鎮東南馬家浜庭前銀杏一株大可六七抱枝虬葉茂參蔽天日遠近稱最一在鎮南長浜村

財神堂 凡四一在鎮之胡家圩一在鎮西南張家浜一在三

家村一在長浜村

聖帝堂 凡二一在鎮西南長浜村一在鎮東南東渚村

猛將堂 遠近各村無地無之甚有一村而分立數祀者祀神之所亦不一或立小廟或附於庵院或供於家悉數難終不復眉列惟鎮東北質洞村所建神廟塗以丹腹故廟左之港遂以紅廟得名鎮東朱家浜之廟前後兩殿視他處爲敞庭前置一大鐵鼎道光三十年村人朱文道募鑄又他處多於春秋首月備鹵簿迎神賽會巡行隴畝間獨鎮西西蒲塘之神崇奉廟中不出此其最著云

寶蓮尼庵 在鎮西北北田肚乾隆五十年重修魏塘周鎬爲

書庵額今零落欲傾尼亦無存矣

海會尼庵 在鎮西北陳家浜同治四年重修庭前紅牡丹一叢歷年已久高及簷際花開纍纍數十百焉

斗姥尼庵 在鎮東南陸家灣本車六庫沈氏家庵咸豐間重修

慧日尼庵 在鎮西北陳許村乾隆四十五年重修光緒三年又修

興隆尼庵 在鎮西北黃墩港咸豐八年重修

金山尼庵 在鎮西南陳家浜道光六年重修

滌塵尼庵 在鎮西南南莊村乾隆二十九年重修光緒四年

又修

回福尼庵 在鎮西南張家浜乾隆五十二年重修道光二十六年又修

冢墓

附坊表

東吳左丞相婁侯陸遜墓 在鎮北三朱浜言若字圩南瀕蕭田湖村中陸氏皆其後裔相傳墓有古柏自晉代遺留人不取犯其枝葉故俗稱爲柏枝墳今樹已無存纍纍然惟一叢荒草矣按吳地記載華亭縣有陸遜墳在東南二十五里橫山又太湖備攷載順治間有某姓卜葬於洞庭山白沙塢得石槨旁卧一碑有東吳左丞相陸遜墓八字某急斂土填之而徙葬於下并諱其事又淮安府志載桃源縣有陸遜墓去治西五里又唯亭鎮志載延福寺後殿基址卽陸遜墓然則陸遜墓究不知何在而問之村中父老皆以爲先世傳聞如

是且謂葬時有衣甲等物意者殆遜之遺衣甲子孫葬此者歟此與曹王墓皆擬乘所載姑仍其舊

晉大司馬東曹掾張翰墓 在鎮東南二畝港南役字圩墓右
敬信庵卽其祠宇今庵中木主猶在按吳江縣屈志載此而
沈志引吳地記及續圖經云張翰葬橫山東五里墳亡以駭
之然嘉慶間曾有墓碑出土當時傳播藝林旋爲墓田農夫
沈於河同治三年震澤王之佐雇人負出已漫漶不可讀矣
又張大純三吳采風類記載張墓亦與屈志同同治十年吳
江黎邑尊庶昌重修立石

張大純過季鷹墓感賦詩珥節江干日已晡季鷹高致冠

東吳宦情落落空千載墓草青青傍五湖杯酒生前經將
相秋風身後重尊鱸只今勢利滔滔是過此還應愧汗無
黃茂調季鷹墓詩秋風乍起廓平蕪縱適飄然撇宦途壯
志豈眞消歲月鄉思原不爲尊鱸折腰節肯輸彭澤宅
人先作釣徒今日來尋歸隱迹一杯黃土映明湖當年此

地列祠堂屋宇從今供法王

墓旁敬信庵
卽祠堂舊址

舊迹存乎碑剝

落

出土卧碑
字多模糊

高風渺矣水蒼茫隱居總勝官居穩宦味寧

同鄉味長誰識遺徽千載後社旗招處草猶香沈偉烈和

詩出土殘碑掩綠蕪步兵遺迹在荒途一杯寂寞誰澆酒

千載流傳有膾鱸釋氏陰隨儒作護

祠宇已圯今爲敬先
信庵木主猶存焉

靈習與古爲徒

十世祖樂耕公墓卽在庵西

年年祭掃常趨謁聚水藏

風並帶湖見幾曹掾去東堂莫待干戈擾八王仕宦抽身
貪縱任隱淪埋骨入蒼茫名留死後情何已志適生前樂
自長回望三高祠不遠春秋俎豆薦馨香進炎和詩蕭蕭
古墓弔荒蕪猶憶秋風賦載途揮手官辭司馬掾關心名
著步兵鱸人傳青史寧康歲像列丹祠范陸徒惟有尊菰
依舊產清芬千古襲江湖朱春霽和詩名流蹤迹寄榛蕪
想見高風脫宦途避世每求千日酒歸鄉寧爲回腮鱸金
章墨綬辭曹掾雨笠煙蓑狎釣徒埋玉深深誰祭掃殘碑
永卧並江湖見幾無意立朝堂早識齊王似趙王心動秋

風聲瑟瑟魂依江水路茫茫一杯酒恨生前短千里尊傳
死後長漫向江村詢父老事留文苑姓名香唐際會和詩
來尋古迹歎荒蕪賸有殘碑卧道途適志一朝辭印綬高
風千載憶尊醺無求死後稱名士惟願生前作酒徒鐵笛
草蓑常繫念廟廊原不逮江湖

唐曹王李明墓 在鎮西江澤村投字圩七十八坵公佔免科
俗稱曹王墳王爲蘇州刺史卒諡曰恭萬民留葬於此詳祠廟

相傳舊有碑爲賈勇者挾棄於水墓左流慶庵卽祠宇也

宋二十相公金和墓 在鎮北金家蕩村總管廟後子太尉細
孫總管昌曾孫元七應龍附俗尊神曰老爺故稱此爲老爺

墳旁存碑石已沒字矣

迪功郎金章墓 在鎮西北搖城村寶慶元年築名鄮山子孫皆祔

明徐民望墓 在鎮之嚴字圩東浜二子二孫祔

沈莊墓 在鎮東北穎村羔景字圩崇遠庵右高大如阜擬乘誤作沈萬四墓道光間墓碑出土始得其詳

盧充賴

南昌人

故沈伯熙墓誌銘有序公諱莊字伯熙姓沈

氏蘇人也其先世以躬稼起家曾大父祐由南潯徙長洲見其地沃衍宜耕因居焉大父富嗣業弗替嘗身帥其子弟力穡事又能推恩以周急難鄉人以長者呼之父旺丰

姿龐厚有二子長曰至季卽伯熙也伯熙爲人持重和慈
衣冠步趨禧如也平居善事親喜接賓客閭閻間禮容恂
恂不倚富以自矜雖愛憎一人亦罔形乎詞色内外威德
之尤克紀綱家事好蓄書史奇玩每清暇則出而陳之坐
若翁於堂上俾家人具酒饌伯熙與其兄獻壽稱觴怡怡
懌懌一門之內父子昆季藹如也洪武十九年春兄至以
戶役故縲紲赴秋官時伯熙亦獲戾京師適與兄同繫獄
入則抱其兄痛泣曰吾兄素羸不堪事今乃至於斯耶旣
而伯熙先出遂得疾甚藥莫療竟以其年五月二十一日
卒於京春秋四十以是月二十七日權厝於上元縣之礪

石岡去年冬兄子德全昇櫬歸未克葬今始營新邱於長
洲二十六都影邨羔景字園之原將卜以洪武二十一年
十二月二十一日窆焉伯熙凡兩娶唐氏俱無子先卒後
娶郭氏生男一人曰基甫六歲嗚呼伯熙之死人謂憂其
兄而殞其生也可悲也夫是宜銘銘曰繄乃祖兮昌厥施
嗟若人兮肅令儀方昆仲兮相諧嬉羗罪疾兮紛交馳念
手足兮人罔知心鬱陶兮形益疲胡一朝兮天奪斯命修
短兮理有之殯旅次兮魂疇依泣老親兮號孤嫠姪返轡
兮涕漣漣卜佳城兮葬以時枕高隴兮揖清谿土肉厚兮
松遲遲正邱首兮禮弗違安汝魄兮奚所悲續有嗣兮祭

不慊勒貞珉兮系銘詩

陸源墓

在鎮北龍亭村傷字圩

南卽祈莊

墓基頗大光緒初有鄉

人於此葬其親啟土得碑遂自立於墓前又相去數武更有一碑緘石之鐵已見惜尙在土中想亦陸氏誌銘也

陳洪謨

鄉貢進士

陸隱君墓誌銘隱君姓陸諱源字宗本蘇之

長洲人曾大父文伯豐財好義著聲於鄉邦大父允道父以安世尙隱德家陳湖之東隱君始徙城中母周氏生子四人隱君其次也事母十餘年竭力奉養及卒喪葬之禮率由乎自盡此其事親以孝也遣子旻補邑庠生訓曰吾事稼穡授汝詩書尙知禮義非徒祿養此其教子以義也

至於絕異端重儒學見緇黃頗僻之徒必峻拒之遇士林搢紳之士必延論之家有文獻通考文集閒時觀覽手不釋卷其所親厚或婚喪之不能舉者則周恤之無吝每厭閭閻喧閭之聲勢利驍兢之習家植淇園萬竿日邀詩友觴詠於其中徜徉自得足跡未嘗入公門亦未嘗識官吏其視功名富貴等如浮雲及論時務事則是是非非確然無所回互使其出而致用則其施設條理必有可觀惜乎隱而未見壽五十有四而卒成化辛丑八月十一日也娶唐氏子男二人長□次卽旻女一適蘇衛百戶李淵孫女二□以□之□年癸卯冬十二月初一日庚申葬於陳湖

隆亭祖塋之次先是衰經踵門泣血請銘於予予以口口
從吾學且與隱君有契故序其概而系以銘銘曰隱君之
行衆善咸萃我銘幽堂永昭百世

義官承事郎浦杲暨妻龔孺人墓 在鎮北龍亭村浦爲店前

村人亦屬貞豐里其墓碑同治間出土

杜啟

郡人福建按察司僉事前文林郎南京山西道監察御史故義官承事郎浦君以

賜墓誌銘君姓浦諱杲以賜字也別號可齊君於成化十

八年輸粟若干石以救荒例得補七品散官承事郎時年

方二十歲志亦宏矣君世居陳湖稱鉅族曾祖諱景葉祖

諱彥忠號畊叟父諱湓母朱氏湓與朱氏於君髫髻時舉

棄世君鞠於畊叟以長既授室特以幼孤之故辜大父之望是懼益思樹立以自見充拓家業日裕以碩然能時爲義舉鄉之橋梁不便於途傾者□之乏者創之陂塘不便於隴淤者濬之渚者疏之司征萬石不朘於民公額亦足有單寒爲貸足之不使償息事如此類不但輸粟一節而已君好客又好飲門之客過無虛日必使款洽盡醉已未嘗辭勞客亦不能辭散然主賓歡然亦不至亂或謂之曰君始可人意哉君亦不讓遂以可齊自號惜乎年止三十有八較其父年已多十一年矣卒之日爲宏治己未十月十一生之日爲天順壬午二月十九配龔氏先卒生二子

長曰恆娶盧氏次曰愉尚幼女一適翁恩繼龐氏孫男一女一俱幼卜以宏治十六年十二月初九日葬於湖傍之左隆亭新阡先事恆以崑山周應文狀介子表姪魏文寶來乞銘泣且拜曰先人存時欲求執事可齊記未果不幸已死托此以畢先志幸憐而賜之予曰諾乃按而序之系之銘曰少孤而存賴於祖壯舊而立紹厥武義施榮軀獲簪組仁惠存腔及貧簞客有過從醉爲主歡歌擊節或起舞德以將之不踰度年未四旬身作古百歲何如稱頑魯有子傳家繼門戶可齊瞑目歸茲土

翰林院編修
邑人沈燾書

學生義官浦以暘妻龔孺人墓志銘宏治丙辰春三月朔長

洲義官浦以陽妻龔孺人卒卜於是年蜡月十一日甲辰
葬隆亨鄉之新塋佳兆也以陽子恆從余游故不庫余未
顯輒持慈溪孫時益先生狀來托銘於余按狀孺人姓龔
氏諱壽貞世爲長洲蓆墟名閭也曾大父志學洪武初以
人材顯於時大父孟德父伯敬援今例授義官母施氏生
孺人爲長女天性貞淑舉止必待母俱甚得親之鍾愛焉
時笄年十九歸浦以陽浦爲陳湖之鉅族外內聚食常越
千指以陽身長鄉賦家政巨細一切皆孺人裁之無不得
宜故以陽無內顧之憂孺人相烝嘗之禮必潔相燕賓之
禮必豐事上也必敬馭下也必濟以嚴慈所以家庭之間

離離如也肅肅如也纖悉罔有所遺此以賜雖少失怙恃
而能修身齊家克振先業又得內助之賢如此惜乎孺人
一疾不起而藥弗效靈噫距其生天順庚辰八月五日春
秋三十有七子男二長恒聘盧氏次愉幼女二長允清許
翁恩次允貞幼在室夫以孺人之賢德固宜克膺遐壽以
享諸福然人之修短則稟於有生之初不可測其所以然
者□□莫非命也順受其正是宜銘銘曰女德貞淑婦道
離離宜膺遐壽以享諸福三十七年天奪之速垂訓後昆
遺言諄復佳兆伊斯隆亨之陸誌銘可徵用告來躅

邑人章浩

書兼刻

鴻臚寺鄉飲賓戴昇墓 在鎮西北七家浜夙興字圩有郭盼

誌銘

郭盼

承務郎鴻臚寺丞致仕

明故鴻臚寺鄉飲賓東軒戴公暨配張

孺人合葬墓識銘戴君朝用將葬其二親乃以行畧乞銘

於余余與公世姻也遂按其狀而書之公諱昇字景輝別

號東軒曾祖仲明祖承甫父文顯俱以行誼聞世居於邑

之貞豐里公樸懋勤敏甫冠卽銳志儒業家頗登戴之楣

楔傑然爲當世之望公性孝友每父母疾憂憤至廢寢食

待昆季曲盡其禮白首無間言居常自御甚簡雅好詩禮

博通經史爲文理醅詞顯朝廷遵洪武例詔郡縣貢諸生

之秀者於國學而公得與焉繼任鴻臚寺出其高才偉畧足稱當代作人之意時有詔許臣民言政事公亦以封事上言時事累數百言忤旨歸田里歲延師必擇文行之卓犖者而遇之有禮曰與其竭力以教子不猶愈於傾貲以嫁女者乎其知所重類如此平生好施予族有婚喪不能成禮者必助之且勉其勤於所業以爲鄧仲華之家訓可法也歲饑捐粟以周貧慕義就食者公數賑之不怠晚薦以鄉飲賓聖天子尚年敬德之典公誠無忝云公之淑配張孺人孝敬稱於尊嫜和柔洽乎妯娌相夫子以順持厥躬以嚴家故饒財身親織紉綽乎有敬姜之風焉凡公之

聲聞於殿陛惠周於宗黨者亦孺人相成之也公享年六十有九距其生爲正統七年壬戌六月十七日也子男三長廷珮卽乞銘者娶馬氏次廷珪娶沈氏先卒三廷璋贅陳氏孫男四曜娶郭氏暉娶沈氏暉娶繆氏兩尚幼孫女三適王恩張麒徐宏曾孫男三女三俱幼珮以嘉靖二年癸未十月一日合葬於邑之夙興字圩新阡爲之銘曰貞豐之陽春暖花香偕老於此軒冕情忘人倫無愧爲世表章雙柑斗酒笑傲滄浪貞豐之陰土沃泉深同穴與居遐想遺音砥行利物如玉如金仁人有後千古同心

江西大庾縣縣丞署知縣徐時亨墓 在鎮之嚴字圩東浜其

六世祖民望墓之東子孫祔

勇士陳鏞墓 在鎮西江澤村之西浜切字圩

戴暉墓 在鎮之南江字圩魚池岸墓有榆樹兩株甚古其妻沈氏同邑官浦人卽山東巡撫林之從女也

長庠生 本朝鄉飲賓徐汝璞墓 在鎮東北冷家灣克念字西圩松陵吳之紀爲撰誌銘今無存弟國學生汝珍墓卽在其右汝珍孫府庠生梅祔

本朝鄉飲賓陶唐諫墓 在鎮西北白蜆江濱南塘灣深履字圩

徐梓墓 在鎮東王巷村帝字圩子吳庠生 欽旌孝子烺祔

長庠貢生徐沂墓 在鎮西北王家浜夙興字圩

潁州學正康熙乙酉科舉人沈作霖墓 在鎮東南吳家村中
江字圩從子吳庠生天相墓卽在其右

府庠增生陶天民墓 在鎮西江澤村張字圩子盱眙縣教諭
卮思嘉善庠生剛惡祔

迂文煥墓 在鎮之嚴字圩東垞長子廷鏞祔楊太史繩武爲
撰誌銘今無存次子國學生廷鑑亦祔焉

鄉飲賓先高祖諱兆葵墓 在鎮西長渠村北子珪字圩先曾
祖國學生諱繼潛祔

長庠武生章騰龍墓 在鎮北祈莊村誠令字圩

元庠歲貢生徐稜墓 在鎮西江澤村張字圩從子吳庠廩貢
生遲墓卽在其右

考授一等州同充補 內廷教習乾隆戊午科副貢生陶善圻
墓 在鎮南善灣村車字圩

吳庠廩生俞達墓 在鎮西北陳家浜忠則字圩子元庠廩貢
生濂耐墓屋數椽咸豐間圯

吳庠生陸起仙墓 在鎮之北友字圩西北

長庠武生章秀墓 在鎮西北許家港夙興字圩弟國學生瑩
耐

元庠增貢生朱同仁墓 在鎮東田肚村大西元字圩子府庠

增生春霆祔

元庠增生徐昌墓墓 在鎮之嚴字圩銀子浜金鉤釣月處
嘉善庠武生沈文淵墓 在鎮西北白蜆江濱深履字圩子候
選州同國學生本仁墓卽在其右門廡松楸今俱無存

覃恩貽贈承德郎先祖諱秉信墓 在鎮東南車六庫翔字圩
長庠生陳晉墓 在鎮之嚴字圩東浜弟勰子長庠廩貢生玠
祔

貽贈儒林郎國學生先伯父諱保宗墓 在鎮東南翁家港島
字圩從兄 敕贈儒林郎議敘八品職員元照祔墓屋經已
西大水而圯墓水猶有存者

贈奉政大夫先伯父諱興宗墓 在鎮東朱家浜大西元字
圩從兄 誥贈奉政大夫國學生琴泉祔有莊慶椿墓表從
子候選同知國學生甄亦祔焉

莊慶椿

震澤人

皇贈奉政大夫候選府同知國子監生勤

補陶君墓表歲癸亥予避兵周莊鎮落魄無歸先時兒子
人寶與長洲明經陶君然爲昆弟交陶氏多高材生以是
遇余皆善絃歌酒席嘗數數見一日元和候選府同知君
甄奉其先大夫勤補贈君行狀屬爲表幽之文荒瞽失學
主臣不敢當明經君復誣諉不已烏庠世儒夸毗諛墓中
人必有名爵者連護官銜數行以爲榮布衣野老之辭無

足重輕明矣班固不受金蔡邕無媿色庶幾哉質言不僞
可也爰爲銘以序之曰君諱元熙琴泉更名先籍興化居
揚州城來遷江南汝益處卿讀書不仕終明諸生秉義秉
信難兄難弟晦迹邱園祿廩米將熾而大弟生三子億
中貨殖業日騰起仲曰興宗號北溪翁是爲君考往紹義
公若敖有祀融洩隧中灼荆卜昌燾後劬躬倚惟贈君失
恃羈弔淒淚在睫不貽親歎後母熏和嬈生如鸞君亦忘
出扶扶博粲天鍾英稟髦逸駒騫筌竇墳典汎濫百川斬
奮功名他途怵先靈椿遠彫蓼我輟篇脂韋瑱瑱玉雪子
子毀方而圓掉頭不屑賈也市徒無甯游俠來潮友韓樹

枚師葉相馬以輿相士以居有真意齋左右圖書戢晉其
中歌詩自娛不隘不恭筦此寸樞麗褫拯人財輕粟籜砥
挺之流或相笑嚙厥配尤賢恣君瘡橐不桀於心唯唯諾
諾允稱內助系出紫陽送往事居罔或不臧歸妹金沈庀
具巾箱坤爲吝嗇母易慨慷如何鞠訓所天忽逝竟天襲
生冊厯加二生卒有徵丙寅丁未咸豐紀元母復謝世俱
不五十爲善加憂有子有孫夫又何求大孝尊親 綸誥
下酬思存寵異令問川流敢慢葬期龍集乙卯體魄永安
祖塋襲兆剖碑譔德松楸夾道石有時泐不朽阡表

覃恩敕贈承德郎先考諱邁宗墓 在鎮東王巷村北旻字圩

有蔣敦復誌銘從弟拔貢生然墓亦在王巷村東南月字圩

蔣敦復

寶山人

覃恩敕贈承德郎按察司經歷加二級陶

君暨配徐太安人合葬墓誌銘桐城方苞氏之言曰銘者
諡誄之遺也古者貴而賢始有誄而諡則雖君父不敢有
私焉若於素不相識之人而與之銘設實背於所稱是讐
言也於吾爲贅行矣方氏之以道自重如此余窮於世自
遭兵燹老病杜門壹意賣文自給蓋所謂言之讐行之贅
者多矣而又不能有厚具金幣僅僅介其友以誠來告乞
爲銘余閱其志之不忍死其親也必不忍誣其親以自陷
於不孝爰據狀爲此文云按狀君姓陶氏諱邁宗字企阜

一字東籬江蘇元和人少佐其父賈顧賈名而士行兄弟
三人惟君以季子奉二親居先人敝廬父歿哀毀盡禮事
其母尤以孝聞生平胸次夷曠特嗜酒嘗曰淵明氏吾祖
也吾知之交友敦氣謹性好施予居於鄉而里中諸善舉
畢立晚年兩兄尚存招聚一室飲酒言笑怡怡如也及君
之歿其母哭曰嗟乎余季今安往耶哭數月亦歿惟君生
能得其親之懽心死益傷乃母心彼生死使其親漠然若
無所與者尚堪爲人子否耶娶於徐能佐君綜家事壻而
當門教其子以成立以次子燾官贈安人而君亦得贈承
德郎按察司經歷加二級其歿也前後相距十有八年爰

合葬焉從六朝人例牒其世系年齒葬所如左而爲之銘
曰惟庸行斯完人實可采名奚湮精爽逝體魄存銘幽宮
視吾文 世系 年齒 葬所

候選布政司經歷沈楸惠墓 在鎮西西蒲塘東南難充字圩
有畢華珍誌銘門廡高敞松楸鬱蔥又北印村有楸惠祖父
墓規模亦與此髣髴也

畢華珍

太倉人

清故候選布政使司經歷沈翠嶺君墓誌

銘吳江沈人燕葬其父翠嶺君後以行狀來乞銘余覽陸
生日愛舅氏哀辭旣多君之行誼今又按狀得其詳合於
銘法遂不固辭君諱楸惠字虞揚翠嶺其號先世出湖州

竹墩七世祖癸溥明季避兵來吳家於吳江之雪巷村遂
隸籍焉君祖諱錫命 妣贈奉直大夫父諱宗源 誥封
奉直大夫母諸氏陶氏 誥封宜人
家世躬耕不求聞達
咸能以節儉自持又值輕徭薄賦之世家日益饒及君始
折節下帷性穎悟舉止凝重既就塾不喜逐常兒戲又容
齋翁以長子早夭冀君早自立所延皆老師宿儒君從授
經解卽能了大義甫弱冠以父春秋高不復銳意舉業惟
讀書孝養佐理門戶纖悉必當由是翁心大慰翁歿益絕
意進取日惟課子授經親交有貧不能讀悉就君塾多所
成就遠近來游文會無虛日喜蓄書嘗與歙鮑徵士廷博

交有志罔羅散失前後刊刻張氏潮楊氏復吉所輯 昭
代叢書凡四百種及王氏鳴盛蛾術編八十四卷吳氏翌
鳳 國朝文徵四十卷皆手自讐訂歷二十寒暑未嘗輟
也中間連年喪子惟幼子人杰存君曰是余積愆所致悲
慟無益乃益事廣德厚施力所能任不責償報尤盡心於
荒政先年大水收瘞溺棺至四千餘具饑饉之後繼以兵
興前後宰是邑者無不引君司事倚君如左右手儲粟賑
貸撫恤防堵諸事宜獨任其鉅出家財無算蓋勇於行其
天性然也君博聞彊識多得朋友之益旣而聞沈少司空
維鐫林文忠則徐緒論務爲有用之學續輯叢書一百餘

種能識其大二公皆 今代賢者讀書求是而以芟訂屬
君則君學老而益進可知最後乃一意敦本臨終無私屬
惟道得修譜二字其神明不亂如此君生於乾隆五十二
年四月十日卒於咸豐三年七月四日年六十又七娶張
宜人生子五人長宸鳳次澂照韻海俱前卒次韻藻幼殤
次卽人杰議敘縣丞女二人長殤次適浙江布政使司理
問震澤凌兆鶚孫三人孫女二人一殤一未字人杰以四
年十二月十八日葬君於二十八都西蒲塘之東南原欲
得銘詞以志幽宮禮也余聞自古風俗之美必觀於鄉書
云孝乎惟孝友於兄弟孔子以爲是亦爲政昔人恆躬耕

以代祿養躬耕非卽可稱高節惟其能養志錫類又以門內之行達之於鄉斯爲賢矣東漢治最近古惟時孝弟力田史不絕書而蒲輪旌廬之盛典則出之自上鄉里以爲榮沈君有焉銘曰謂世德無徵邪以衍以似謂天道冥冥邪喪子有子非多聞之爲美而酷行之爲美於乎沈君澤及鄉里伊可風也繼繼繩繩無終窮也

鄉飲賓 恩給八品壽員徐勳墓 在鎮東王巷村南戾字圩
長庠附監生戴其章暨其弟咸豐己未科副貢生其相墓 在鎮西南三家村南振字圩

廣東布政使司布政使楊慶麟墓 在鎮東南寺巷村華字圩

光緒六年十月葬門廡松楸規模略具

骨塔

在桃花庵後康熙三十三年里人陶天民徐渾募建雍

止間天民子琳修并募築圍牆沈作霖撰引

沈作霖募建骨塔圍牆引嗟彼窮黎憫茲瘠魄生無華屋
歿鮮佳城春露秋霜能蝕道旁枯骨淒風苦雨每侵原上
遺骸凡所得之見聞不忍形諸言語仁人慘目長者傷心
此吾萬石陶夫子暨里中同志所爲募建骨塔於東莊也
濟以慈航銘仁靡地登茲寶筏載德如天塔峙巍峩擬永
百年香火碑荒剝落遽隳廿載勩劬宿德難忘幽魂飲恨
賴吾惟一世兄克繼前人之志獨承修塔之貲德與工新

善垂石固猶念弗加屏蔽廣漢公流渥將衰不峻牆垣冥
漠君憑依未妥獨爲君子嘯無埋齒掩骼之仁共證菩提
應有死樂生安之願仍望並發仁心同成善果計工程料
量力捐金俾先夫子得頽首於九天而衆亡靈亦感心於
十地矣

義冢 在鎮之嚴字圩一百九十六畝官田二畝八分九釐二
毫嘉慶十三年懷善局置同治八年又於其旁置一百九十
五畝官田二畝三分

鄉厲壇 在義冢之旁光緒元年二月懷善局重築樹石每歲
清明日七月望十月朔祭鄉中無祀之鬼供城隍土地神於

壇上以監祭

節孝坊 鎮中凡四一在南江字圩城隍廟北雍正十三年爲
沈應祥妻孫氏立一在下江字圩世德橋北乾隆五年爲俞
世瑄妻陸氏立一在中江字圩楊家潭西乾隆六年爲陸鶴
翔妻沈氏立一在下江字圩永慶庵南乾隆七年爲徐鴻傳
妻沈氏立 附近村中凡六一在鎮北韓鎮村寒貞字圩雍
正三年爲韓秉質妻王氏立木坊乾隆四十六年重修一在鎮北張家港
雍正十三年爲楊茂林妻李氏立一在韓鎮村寒貞字圩乾
隆二年爲韓祖培妻吳氏立一在鎮東南楓里橋北役字圩
乾隆六年爲郭培妻陳氏立一在鎮西南長浜村北礮字圩

乾隆八年爲陶尚珍妻朱氏立一在楓里橋北役字圩嘉慶
十四年爲郭濬川妻張氏立建於墓者凡四一在鎮西北
印村東兄卯字圩乾隆四年爲方瑞華妻湯氏立一在鎮東
南北許村西北乾隆十年爲韓爾卿妻朱氏立一在鎮東王
巷村北北辰字圩乾隆三十七年爲蔣鳳徵妻顧氏立一在
鎮東北秀王浜東南惡字東圩嘉慶十五年爲國學生韓蓮
妻諸氏立